

南宋文範

和 16  
34/  
2





利  
294  
及



南宋文範卷四目錄

樂府

田家謠

古鏡行

桃源行

西風行

桃源行

雷雨行

江南春

寒食行

靖康迎駕行

古劍歌

清江行

巫山高

洪芻

汪藻

李綱

李綱

陳與義

陳與義

張嶠

鄧肅

呂本中

劉子翬

王銍

新錄  
有物

南宋文範卷四目錄



清江曲

蘇庠

後清江曲

蘇庠

成生山水畫歌

徐俯

惜別行送林梅卿

大龜赴闕

黃公度

輸粟行

周紫芝

寒食曲

周紫芝

秣陵行

周紫芝

遠遊篇

朱子

采蓮曲

蕭德藻

臘月村田樂府十首

范成大

冬春行

燈市行

祭竈詞

口數粥行

爆竹行

燒火盆行

照田蠶行

分歲詞

賣癡狀詞

打灰堆詞

巫山高

姑惡

入峽歌

跋尤延之左司所藏光堯御書歌

石首縣雨中繫船戲作短歌

瞿塘歌

風雨中望峽口諸山奇甚戲作短歌

九月一日夜讀詩稟有感走筆作歌

范成大

范成大

楊萬里

楊萬里

陸游

陸游

陸游



大雪歌

山南行

成都行

古別離

斷碑歎

豐年行

鴻門宴

夷門歌送修德還闕

趙振文在城北廂兩月無日不遊馬腔作歌美之請知振文

者同賦

白苧歌

靈璧石歌為方巖王郎中作

寄衣曲

促促詞

陸游

陸游

陸游

陸游

陸游

劉翰

陳傅良

葉適

戴復古

戴復古

許志仁

徐照

從軍樂

謫仙歌

篋篋引

義獸行

琵琶引

堰上行上周憲

古懊惱歌

劍歌行

和南塘食荔歎

運糧行

春夜曲

太行道

正氣歌

峨眉老人別子歌

劉過

陳亮

姜夔

趙汝燧

杜範

吳泳

嚴羽

嚴羽

劉克莊

劉克莊

姚鏞

岳珂

文天祥

謝翱



烏棲曲擬張司業

瓊花引

花卿冢行

鴻門讌

燕歌行

樂府二首

冬青花

冬青行二首

蠶婦辭

古樂府

謝翱

謝翱

謝翱

謝翱

汪元量

吳龍翰

林景熙

唐鈺

陳普

程垣

南宋文範卷四

長洲顧少卿先生鑒定

秀水莊仲方編

樂府歌行

田家謠

洪芻

鳩婦勃磈農荷鉏身披襤褸頭茅蒲雨不破塊田坼圖稊稗青  
嘉穀枯大婦碓春頭鬢疏小婦拾穗行餉姑四時作苦無袴襦門  
前叫嗔官索租

古鏡行

汪藻

我有辟邪鏡得之咸陽宮其陰為天池一母將九龍旁書負圖字  
土蝕如旋蟲緘以駁雜珍妙極倕之工請言照遠近十里秋毫空  
豈不鑿脂澤所貴肝膽通問誰為此器太古非人功客聞重歎息  
意欲窺靈蹤高臺不辭倚恐客難稱容繩窮匣半啟四室來悲風  
日車當晝留羞澀如頑銅森然髮上指凜若臨霜鋒我還撫客手  
此豈世寶同揮淚兩無言掩鏡鞞囊中



桃源行

汪藻

祖龍門外神傳壁方士猶言仙可得東行欲與羨門親咫尺蓬萊  
滄海隔那知平地有青春只屬尋常避世人關中日月空萬古花  
下山川長一身中原別後無消息聞說胡塵因感昔誰教晉鼎判  
東西卻愧秦城限南北人間萬事逾可憐此地當時亦偶然何事  
區區漢天子種桃辛苦望長年

西風行

李綱

西風隕高梧秋暑退殘熱豈不欣微涼寤歎驚急節歲華聿云暮  
露氣繁霜結干戈隨凝陰虜騎壯勝鐵邊防久凋殘河洛據戎羯  
中原無長城何以限逸越傳聞今年春關輔已蹀血強兵健馬區  
乘間肆陵蔑况茲柔脆鄉豈復勞齧江漢非不深天險為人設  
要害無重兵一葦自可絕恬然不為備廟算豈有說翠華果何從  
大計宜早決緬懷沙漠寒矯首望漢月杳無鳴雁來甯不野鼠掘  
何時金鳳輦復返蒼龍闕羣生有安堵國恥稍一雪努力肉食謀

旁觀已心折

桃源行

李綱

桃源之事世傳以為神仙非也以淵明之記考之特秦人避世  
者子孫相傳自成一區遂與世絕耳今閩中深山窮谷人跡所  
不到者往往有民居田園水竹雞犬之音相聞禮俗敦古雖斑  
白未嘗識官府者此與桃源何異感其事作詩以見其志  
武陵溪水流潺湲漁舟鼓枻迷泝沿谿窮路盡恍何處桃花爛熳  
蒸川原花間邑屋自連接雲外雞犬聲相喧衣裳不同俎豆古見  
客驚怪爭來前殺雞為黍持勸客借問世上今何年自從秦亂避  
徭役子孫居此因蟬聯不知漢祖以劔起况復魏晉稱戈鉞慙慙  
留客不肯住落花流水空依然淵明作記真好事詩人粉飾言神  
仙我觀閩境多如此峻溪絕嶺難攀援其間往往有居者自當水  
竹饒田園耄倪不復識官府豈憚黠吏催租錢養生送死良自得  
終歲飽食仍安眠何須更論神仙事只此便是桃花源



雷雨行

陳與義

憶昨炎正中不融元帥仗鉞臨山東萬方磬磬叫上帝黃居已照  
睢陽宮嗚呼吾君天所立豈料四載猶服戎禹巡會稽不到海未  
省駕船觀民風定知諫諍有張猛不可危急無高其自古美惡周  
必復犬羊汝莫窮妖凶吉語四奏元氣通德音夜發春改容雷雨  
一日遍天下父老感泣霑其胸臣少憂國今成翁欲起荷戟傷疲  
癯小遊太乙未移次大樹將軍莫振功劉琨祖逖未足雄晏球一  
戰腥臊空諸君努力光竹素天子可使塵常蒙君不見夷門山頭  
虎復龍向來佳氣元葱葱

江南春

陳與義

雨後江上綠客悲隨眼新桃花十里影搖蕩一江春朝風逆船波  
浪惡暮風送船無處泊江南雖好不如歸老薺遶牆人得肥

寒食行

張嶠

寒食祠墳由來已久亂離之後每經此節孝子仁人孺慕感傷

可勝言耶因作寒食行以敘其痛苦之意云

寒食由來古今重四海人人作邱壠兩京道上松柏多盡是王公  
大家塚伊昔年年當此時鈿車寶馬相追隨紛紛錦樹滿原野暖  
風遲日爭光輝草間燒紙野間哭羅列杯盤烏攫肉侵晨發罷薄  
暮歸旋風翦翦吹餘灰爾時馬醫夏畦鬼亦受子孫追養禮豐薄  
由來稱有無咸具盤餐致醪醴家家邱墳各為主何人壠上無新  
土自從遭亂去鄉關幾歲松楸不曾覩况復其間多發掘孝子慈  
孫淚如雨流落他州遇火前去年如此復今年新阡舊壠祇回首  
無復原頭挂紙錢君不見東都之傍永安道車轍平來生碧草四  
時祠祭今寂然五陵春樹生蒼煙

靖康迎駕行

鄧肅

女真作意厭人肝揮鞭直視無長安南渡黃河如履地東有太行  
不能山帝城周遭八十里二十萬兵氣裂眦旌旗城上亂雲煙腰  
間寶劍凝秋水雪花一日政濛濛阜旗登城吹黑風我師舉頭不



敢視脫兔放豚一掃空夜氣火光迷鳳闕征鼓砰轟地欲裂斯民  
警警將焉之相顧無言惟泣血僕射何公叩龍墀圍閉相臣臣噬  
臍奇兵化作乞和使誓捐一死生羣黎遊談似壽胡帥怒九鼎如  
山疑弗顧郊南期稅上皇輿截破黃流徑歸去陛下仁孝有虞均  
忍令胡騎聳吾親不龜太史自鞭馬一出喚回社稷春虜人慕得  
猶貪利千乘載金未滿意釵鈿那為六宮留大索民居幾卷地六  
龍再為蒼生出身磨虎牙恬不恤重城突兀萬胡奴杳隔鑿與今  
十日南門赤子日駢闐爭掬香膏自頂然忿氣為雲淚為雨漫漫  
白晝無青天太王事狄空金帛坐使卜年踰八百年聽端在民心  
耳蒼蒼誰云九萬隔會看春風擁楮黃萬民歌呼喜欲狂天宇無  
塵瞻北極旄頭落地化頑石

古劍歌

呂本中

寒江九月雷殷空落日倒射千山紅江頭樹木半傾倒衰衰不盡  
洪濤風風中有物如長戟電光忽來傾霹靂雨罷晴開不復知乃

是潛蛟倚長石蒼皮半卷頗飛動澀薛中開欲跳躑青熒野火下  
絕水天矯長煙轉空壁天生神物有時出歲月飄流為誰得銅花  
欲盡秋水渾尚有千年妖血痕向來天地亦兒戲俄頃變怪徒紛  
紜君不見豐城之來亦不久寶氣何為上牛斗

清江行

劉子翬

漁翁一棹老清波稚子學語能漁歌日暮沙頭寒熱竹雨餘船角  
亂堆蓑鬢殘小鮮仍自鱸湖海茫茫醉鄉內夜闌酒渴漱寒流月  
照蘆花上蓬背

巫山高

王銍

十二危峯隱寒霧旁連三巴下三楚斷崖青黃聳天壁秀色蒼茫  
接天路鼓瑟玉琴嬉帝旁下鎮九淵稱帝女冥心可見類相求夢  
裏襄王契神遇鏘然玉佩似可期倏爾電旌去無所天風浩蕩吹  
太清萬里憑虛送飛步行雲行雨終不來歲月人間幾朝暮那知  
一戲疑萬古至今不知高唐處仙兮神兮非與是流傳只有蘭臺



賦山藏虎兇爭怒號峽東江水翻波濤舟楫寄命輕鴻毛猶起羨  
慕成譏嘲行人所見日卑淺仰首彌覺巫山高

清江曲

蘇庠

屬玉雙飛水滿塘菰蒲深處浴鴛鴦白蘋滿櫂歸來晚秋著蘆花  
兩岸霜扁舟繫岸依林樾蕭蕭兩鬢吹華髮萬事不理醉復醒長  
占煙波弄明月

茗溪漁隱叢話

後清江曲

蘇庠

層波渺渺山蒼蒼輕霜隕木蓮葉黃呼兒極浦下箬簪社饗欲熟  
浮蛆香輕帆浙瀝鳴秋雨日暮沈流自相語一笛秋風萬事休白  
鳥翩翩落煙渚

茗溪漁隱叢話

成生山水畫歌

徐俯

畫水不畫濕畫山不畫堅盈尺之紙數寸管便有江湖萬里天成  
生貌古心亦古造化爲工筆端取立冬起雷夏造冰翻手爲雲覆  
手雨嶺外荒山與野水自昔不聞傳畫史只畫瀟湘與洞庭於今

卻在兵戈裏翠峯碧嶂鬱然來病眼愁心次第開人家浦澈扁舟  
渡何日真能到一迴

聲畫集

惜別行送林梅卿

黃公度

刺桐城邊桐葉飛刺桐城外行人稀客來別我有所適問客此去  
何當歸林卿妙齡才秀發胸中萬卷涵溟渤家聲合沓蓋九州里  
第嶙峋表雙闕竭來試吏天南方驥縶烏能騁所長梅仙脫身東  
市卒杜老把筆中書堂傳道淮壖減豺虎政須禮樂事明主之子  
軒軒霄漢姿好向春風刷毛羽

輸粟行

周紫芝

天寒邨落家家忙飯牛穫稻催滌場燎薪炊黍呼婦子夜半春粟  
輸官倉大兒擔囊小負橐廩傾困不須惡縣胥里正不到門了  
得官租舉家樂去年有米不願餘今年白米要如珠路旁老人拍  
手笑盡道官兵嫌米粗良農養兵與敵競敵騎不來自亡命田家  
終歲貢耕糜十農養得一兵肥一兵倡亂十兵隨千家一炬無子



遺莫養兵養兵殺人人不知

寒食曲

周紫芝

三月江南好春色買酒家家作寒食男呼女喚俱出遊扶老醉歸  
歡樂極街頭盡日無人行多在山邨少在城踏歌賽願一時了上  
冢歸來聞笑聲豈料如今一百五畫戟滿城催戰鼓子孫半作泉  
下人薄酒不澆山上土死者已往生者存隨分歡娛各兒女烹魚  
裹菜當盤飧花作紅妝鳥歌舞君不見江南江北多戰場去年白  
骨無人藏

秣陵行

周紫芝

秣陵城門夜不開城頭搗鼓鳴春雷緋衣擎火燎民屋萬井一炬  
飛紅埃道旁橫尸人不識血流但見秦淮赤府中官吏一百人盡  
取姓名書罪籍元戎被執不得歸賊坐黃堂縱呵叱明朝傳檄下  
九州九州牧伯不敢收可笑官軍橐羽箭環視走卒攫城樓將軍  
樓船下巫峽膽落雙旌俱捲甲日梟五十三頭顱一戰何曾短兵

接今年新起故將軍灞陵醉尉勿浪嗔文致太平武定亂非渠誰  
復清風塵

遠遊篇

朱子

舉坐且停酒聽我歌遠遊遠遊何所至咫尺視九州九州何茫茫  
環海以為疆上有孤鳳翔下有神駒驤孰能不憚遠為我遊其方  
為子奉尊酒擊鉢何慨慷送子臨大海寒日為無光悲風來遠壑  
執手空彷徨問子何所之行矣戒關梁世路有險艱出門始憂傷  
東征憂陽谷西遊畏羊腸南轅犯癘毒北駕風裂裳願子馳堅車  
躡險摧其剛峩峩既不支瑣瑣誰能當朝登南極道莫宿臨太行  
睥睨即萬里超忽凌八荒無為蹙蹙者終日守空堂

采蓮曲

蕭德藻

清曉去采蓮蓮花帶露鮮溪長須急漿不是趁前船  
相隨不覺遠直到暮煙中恐嗔歸得晚今日打頭風

臘月村田樂府十首

并引

范成大



余歸石湖往來田家得歲暮十事採其語各賦一詩以識土風  
號村田樂府其一冬春行臘日舂米爲一歲計多聚杵曰盡臘  
中畢事藏之土瓦倉中經年不壞謂之冬舂米其二燈市行風  
俗尤競上元一月前已賣燈謂之燈市價貴者數人聚博勝則  
得之喧盛不減燈市其三祭竈詞臘月二十四日夜祀竈其說  
謂竈神翼日朝天白一歲事故前期禱之其四口數粥行二十  
五日煮赤豆作糜暮夜闔家同饗云能解瘟氣雖遠出未歸者  
亦留貯口分及襪襪小兒僮僕皆預故名口數粥豆粥本正月  
望日祭門故事流傳爲此其五爆竹行此他郡所同而吳中特  
盛惡鬼皆畏此聲古以歲朝而吳以二十五夜其六燒火盆行  
爆竹之夕人家各又於門首燃薪滿盆無貧富皆爾謂之相煖  
熱其七照田蠶詞與燒火盆同日村落則以禿帚若麻蘆竹枝  
輩燃火炬縛長竿之杪以照田爛然徧野以祈絲穀其八分歲  
詞除夜祭其先竣事長幼聚飲祝頌而散謂之分歲其九賣癡  
獸詞分歲罷小兒繞街呼叫云賣汝癡賣汝癡世傳吳人多獸  
故兒輩諱之欲買其餘益可笑其十打灰堆詞除夜將曉雞且  
鳴婢獲持杖擊壤致詞以祈利市謂之打灰堆此本彭蠡清洪  
君廟中打如願故事惟吳下至今不廢云

冬春行

臘中儲書百事利第一先舂年計米羣呼步碓滿門庭運杵成風  
雷動地節勻箕健無栖糠百斛只費三日忙齊頭圓潔箭子長隔  
籬輝日雪生光土倉瓦竈分蓋藏不蠹不腐常新香去年薄收飯  
不足今年頓頓炊白玉舂耕有種夏有糧接到明年秋刈熟鄰舍  
來觀還嘆嗟貧人一飯不可賒官租私債紛如麻有米冬舂能幾  
家

燈市行

吳臺今古繁華地偏愛元宵燈影戲舂前臘後天好晴已向街前  
作燈市疊玉千絲類鬼工翦羅萬眼人力窮兩品爭先最先出不



待三五迎東風兒童種麥荷鋤倦偷閒也向城中看酒壚博塞雜  
歌呼夜夜長如正月半灾傷不及什之三歲寒民氣如春酣農家  
亦幸荒年少始覺城中燈市好

祭竈詞

古傳臘月二十四竈君朝天欲言事雲車風馬少留連家有杯盤  
豐典祀猪首爛肉雙魚鮮豆沙甘鬆粉餅圓男兒酌獻女兒避醑  
酒燒錢竈君喜婢子爭鬪君莫聞貓狗觸穢君莫嗔送君醉飽歸  
天門杓長杓短勿復云乞取利市歸來分

口數粥行

家家臘月二十五浙米如珠和豆煮大杓撩鐺分口數疫鬼聞香  
走無處餓薑屑桂澆蔗糖滑甘無比勝黃梁全家團圍罷晚飯在  
遠行人亦留分襁中孩子強教嘗餘波溥霑獲與臧新元叶氣調  
玉燭天行已過來萬福物無疵厲年穀熟長向臘殘分豆粥

爆竹行

歲朝爆竹傳自昔吳儂政用前五日食殘豆粥掃罷塵截筒五尺  
煨以薪節間汗流火力透健僕取將仍疾走兒童卻立避其鋒當  
階擊地雷霆吼一聲兩聲百鬼驚三聲四聲鬼巢傾千聲連百神  
道甯八方上下皆和平卻拾焦頭疊牀底猶有餘威可驅厲屏除  
藥物添酒杯盡日嬉遊夜濃睡

燒火盆行

春前五日初更後排門燃火如晴晝大家薪乾勝豆豉小家帶葉  
燒生柴青煙滿城天半白棲鳥驚飛啼格磔兒孫圍坐雞犬忙鄰  
曲歡笑遙相望黃宮氣應纔兩月歲陰猶驕風慄烈將迎陽合作  
好春正要火盆生煖熱

照田蠶行

鄉村臘月二十五長竿然炬照南畝近似雲開森列星遠如風起  
飄流螢今春雨電繭絲少秋日雷鳴稻堆小儂家今夜火最明的  
知新歲田蠶好夜闌風焰西復東此占最吉餘難同不惟桑賤穀



南齊書卷四  
其瓦仍更苧麻無節菜無蟲

分歲詞

質明奉祠今古同吳儂用昏蓋土風禮成廢徹夜未艾飲福之餘  
卽分歲地爐火軟蒼朮香釘盤果餌如蜂房就中脆餠專節物四  
座齒頰鏘冰霜小兒但喜新年至頭角長成添意氣老翁把杯心  
茫然增年及爾減吾年荆釵勸酒仍祝願願翁尊前且強健君看  
今歲舊交親大有人無此杯分老翁飲罷笑撚鬚明朝重來醉屠  
蘇

賣癡歌

除夕更闌人不寐厭禳滯鈍迎新歲小兒呼叫走長街云有癡歌  
召人買二物于人誰獨無就中吳儂乃有餘巷南巷北賣不得相  
逢大笑相挪揄櫟翁塊坐重簾下獨要買添令問價兒云翁買不  
須錢奉賒癡歌千百年

打灰堆詞

除夜將闌曉星爛糞埽堆頭打如願杖敲灰起飛撲籬不嫌灰沈  
新節衣老媪當前再三祝只要我家長富足輕舟出商重船歸大  
特引犢雞哺兒野繭可縑麥兩歧短衲換卻長衫衣當年婢子挽  
不住有耳猶能聞我語但如我願不汝呼一任汝歸彭蠡湖

巫山高

并序

范成大

余舊嘗用韓无咎韻題陳秀陵巫山圖考宋玉賦意辨高唐之  
事甚詳今過陽臺之下復賦樂府一首世傳瑤姬爲西王母女  
嘗佐禹治水廟中石刻在焉

濕雲不收煙雨霏峽船作灘梢廟磯杜鵑無聲猿叫斷惟有飢鴉  
迎客飛西真功高佐禹跡斧鑿鱗皴倚天壁上有瑤簪十二尖下  
有黃湍三百尺蔓花蚪木風煙昏薛佩翠帷香火寒靈旂飄忽定  
何許時有行人開廟門楚客詞章元是諷紛紛餘子空嘲弄玉色  
頰顏不可干人間錯說高唐夢

姑惡

范成大



姑惡水禽以其聲得名世傳姑虐其婦婦死所化東坡詩云姑惡姑惡姑不惡妾命薄此句可以泣鬼余行苕霅始聞其聲晝夜哀厲不絕客有惡之以爲此必子婦之不孝者余爲作姑惡

詩

姑惡婦所云恐是婦偏辭姑言婦惡定有之婦言姑惡未可知姑不惡婦不死與人作婦亦大難已死人言尙如此

入峽歌

楊萬里

峽山未到日日愁峽山已到愁卻休不是朝來愁便散愁殺人來天不管昨宵遠望最高尖今朝近看雲隔簾樓船衝雨過山下雨扇屏風生色畫江神不遣客心驚雲去雲來遮巖局忽然寒雲露山脚仰見千丈翠玉削篙師相賀漲痕落今日可到鷓磯泊

跋尤延之左司所藏光堯御書歌

楊萬里

光堯太上皇帝御書西漢書列傳目上有璽文曰帝錄臣表得之以示臣萬里謹拜手稽首作歌敬書於後

鸞臺長史老野僧月前病鶴霜後蠅文書海裏衰不了黑花亂發霜眼睛故人同舍尤太史敲門未揖心先喜袖中傾下十斛珠五色光芒射牕几自言天風來帝旁拾得復古殿中雲一張向來太上坐朝罷勝日光風花柳暇浣花叢裏冰雪容宣城雞距針芒鋒天顏有喜聊小試西京書目供遊戲韓彭魏霍欣挂名舒向卿雲感書字漢廷多少失意人九京寸恨不作塵一朝翻入聖筆底昭回之光喚渠起小臣濫巾逢掖行手抄孝經不徹章何曾下筆寫史漢再拜恭覽汗透裳太史結廬伴鷗鷺錫山山下荆溪渡紅光紫氣燭天衢箇是深藏寶書處

石首縣雨中繫船戲作短歌

陸游

庚寅去吳西適楚秋晚孤舟泊江渚荒林月黑虎欲行古道入稀鬼欲語鬼語亦如人語悲楚國繁華非昔時章華臺前小家住蒨屋雨滴秋風吹悲哉秦人真虎狼欺侮六國囚侯王亦知廢興古來有但恨不見秦先亡開牕醉汝一杯酒等爲亡國秦更醜驪山



冢破已千年至今過者無傷憐

瞿塘歌

陸游

四月欲盡五月來峽中水漲何雄哉浪花高飛暑欲雪灘石怒轉  
晴天雷千艘萬舸不敢過篙師施工心膽破人人陰拱待勢衰誰  
敢輕行犯奇禍一朝時去不自由山腹空有沙痕留君不見陸子  
歲莫來夔州瞿塘峽水平如油

風雨中望峽口諸山奇甚戲作短歌

陸游

白鹽赤甲天下雄拔地突兀摩蒼穹凜然猛士撫長劍空有豪健  
無雍容不令氣象少淳澗常恨天地無全功今朝忽悟始歎息妙  
處原在煙雨中太陰殺氣橫慘淡元化變態含空濛正如奇材遇  
事見平日乃與常人同安得朱樓高百尺看此疾雨吹橫風

九月一日夜讀詩稟有感走筆作歌

陸游

我昔學詩未有得殘餘未免從人乞力孱氣餒心自知妄取虛名  
有慙色四十從戎駐南鄭酣宴軍中夜連日打球築場一千步閱

馬列殿三萬疋華燈縱博聲滿樓寶釵艷舞光照席琵琶弦急冰  
雹亂羯鼓手勻風雨疾詩家三昧忽見前屈賈在眼元歷歷天機  
雲錦用在我翦裁妙處非刀尺世間才傑固不乏秋毫未合天地  
隔放翁老死何足論廣陵散絕還堪惜

大雪歌

陸游

長安城中三日雪潼關道上行入絕黃河鐵牛僵不動承露金盤  
凍欲折虬髯豪客狐白裘夜來醉眠寶釵樓五更未醒已上馬衝  
雪卻作南山遊千年老虎獵不得一箭橫穿雪皆赤拏弓爭死作  
牛吼震動山村裂崖石曳歸擁路千人觀髑髏作枕皮蒙鞍人間  
壯士有如此胡不來歸漢天子

山南行

陸游

我行山南已三日如繩大路東西出平川沃野望不盡麥隴青青  
桑鬱鬱地近函秦氣俗豪秋千蹴踘分朋曹苜蓿連雲馬蹄疾楊  
柳夾道車聲高古來歷歷興亡處舉目山河尚如故將軍壇上冷



雲低丞相祠前春日暮國家四紀失中原師出江淮未易吞會看  
金鼓傳天下卻用關中作本根

成都行

陸游

倚錦瑟擊玉壺吳中狂士遊成都海棠十萬株繁華盛麗天  
下無青絲金絡白雪駒日斜馳遣迎名姝胭脂褪盡見玉膚綠鬢  
半脫嬌不梳吳綾便面對客書斜行小字密復疏墨君秀潤瘦不  
枯風枝雨葉蕭蕭殊月浸羅襪清夜徂滿身花影醉索扶東來此  
歡墮空虛坐悲新霜點鬢鬢易求合浦千斛珠難覓錦江雙鯉魚

古別離

陸游

孤城窮巷秋寂寂美人停梭夜歎息空園露濕荆棘枝荒蹊月照  
狐狸迹憶君去時兒在腹走如黃犢翁未識紫姑吉語元無據况  
憑瓦兆占歸日嫁來不省出門前魂夢何曾識酒泉粉綿磨鏡不  
忍照女子盛時無十年

斷碑歎

興元姚節度園以折碑為石筍文猶可識蓋梁  
蕭懿墓碑簡文為太子時撰書法道美可愛

陸游

二蕭同起南蘭陵正如文叔與伯升至今人悲大蕭死齋恨不見  
梁家興崇崇之陵久為谷豈惟羣盜分珠玉斷碑槎牙棄道邊文  
字班班猶可讀剝剝苔蘚一悽然俯仰人間幾變遷世人作碑君  
勿哂千載園林須石筍

豐年行

陸游

秋風蕭蕭秋日薄築場穫稻方竭作志士雖懷照歲悲農家自足  
豐年樂撥醅白酒喚鄰曲啄黍黃雞初束縛長魚出網健欲飛新  
兔卧盤肥可臠躬耕辛苦四十年一飽豈非天所醉書生識字亦  
聊爾莫作楊雄老投閣

鴻門宴

劉翰

江東遙遙八千騎大戰小戰七十二劉郎曉鞭天馬來蹴踏長安  
開帝里子嬰已降隆準公君王置酒鴻門東張良已去玉斗碎三  
月火照咸陽紅繡衣歸來日將夜可惜雄心天不借當時已失范



增謀尚引長戈到垓下刁斗乍急營壘驚夜深旗尾秋風橫玉帳  
佳人不成夢月明四面聞歌聲拔劍相看淚如雨我作楚歌君楚  
舞明朝寶馬一聲嘶江北江東皆漢土

夷門歌送修德還闕

陳傅良

萬古江入海吳蜀有不通不通誰使然人自爲異同昔在李孟錢  
士各懷土封靜言彼何尤亦各徇所忠恭惟宋受命三姓皆朝宗  
斯文已百年名世纔數公眉山與金陵奈何不相容大雅如關洛  
亦復互詆攻朋分文字間禍起師友中四郊忽戎馬塵滿夷門宮  
往事已覆轍後事如飄蓬一飯忘苦饑一褐忘苦冬身謀每不長  
王事靡有終有客獨惻惻萬里興深衷相過話離合歷歷繇熙豐  
我久世慮薄念之涕無從貧賤將安歸功名在其逢有能用斯人  
可使百阻空西人不爲西東人不爲東

趙振文在城北廂兩月無日不遊馬塍作歌美之請知振文  
者同賦

葉適

馬塍東西花百里錦雲繡霧參差起長安大車喧廣陌問以馬塍  
云未識醪醑縛籬金沙牆蒨樓閣山茶房高花何啻千金直著  
價不到宜深藏青鞋翩翩烏鶴袖嚴勞引首金蔣後隋園摘蕊煎  
凍酥小分移牀獻春酒陳通苗傅昔弄兵此地寂寞狐狸行聖人  
有道賁草木我輩栽花樂太平知君已於茗水住盡日櫓聲搖上  
渚無際滄波蓼自分有情碧落鷗偏聚追逐風光天漫許拋擲身  
世人應怒君不見南宮載寶回何如趙子穿花去

白苧歌

戴復古

雪爲緯玉爲經一織三滌手織成一片冰清如夷齊可以爲衣陟  
彼西山干以采薇

靈壁石歌爲方巖王郎中作

戴復古

靈壁一峯天下奇體勢雄偉身巍巍巨靈怒拗天柱擲平地蒼龍  
驤首尾兩片黑雲腰夾之聲如青銅色碧玉秀潤四時嵐翠濕乾  
坤所寶落世間鬼神上訴天公泣謂有非常人致此非常物可磨



斫賊劔可倚擊姦笏可祝不老年可比至剛德自從突兀在眼前  
溪山夜夜生顏色君不見杭州風流白使君雅愛天竺雙雲根又  
不見奇章公家太湖碧高下品題分甲乙二公名與石不磨今到  
方巖有靈壁我來欲作靈壁歌擊石一唱三摩挲秋風蕭蕭淮水  
波中分南北橫干戈烽塵埋沒漢山河泗濱靈壁今如何安得此  
石來巖阿鬱然盤礴中原氣對此令人感慨多

寄衣曲

許志仁

貂裘雖云温非妾手中迹唯此萬里衣一鍼三歎息歎息恐人聞  
縫時常避人開緘勿嫌澆中有雙淚痕江南十月雁初飛邊地纔  
秋塞草衰衣成妾手君甯見寒到君邊妾自知寄書問征夫好在  
何當還西風吹妾夢夜度魯陽關

促促詞

徐照

促促復促促東家歡欲歌西家悲欲哭丈夫欲耕長忍飢老婦勤  
織長無衣東家鋪君不出戶父爲節級兒抄簿一年兩度請官衣

每月請米一石五小兒作軍送文字一旬一輪怨辛苦

從軍樂

劉過

芙蓉寶劔鷲鴞刀黃金絡馬花盤袍臂弓腰矢出門去百戰未怕  
皋蘭塵酒酣縱獵自足快詩成橫槊人稱豪但期處死得其所一  
死政自輕鴻毛將軍三箭定天山丞相五月入不毛生前封侯死  
廟食雲臺突兀秋山高書生如魚蠹書冊辛苦雕篆眞徒勞兒時  
鼓篋走京國漸老一第猶未叨自嗟賦命如紙薄始信從軍古云  
樂

謫仙歌

有序

陳亮

清夜獨坐天地無聲星斗動搖欣觀李白集高吟數篇皆古今  
不經人道語騷章逸句洒然無留思寥寥數百年間揚鞭獨步  
吾所起敬起慕者太白一人而已感歎久之恨無人能繼太白  
後因成謫仙歌以祝太白舉觥以酬太白太白有靈其聽我聲  
知我意矣



李白字太白清風肺腑明月魄揚鞭獨步止一人我誦太白手屢  
拍嘗聞太白長庚星夜半星在天上明仰天高聲叫李白星邊不  
見白應聲又疑白星是酒星銀河釀酒天上傾柰無兩翅飛見白  
王母池邊任解醒欲遊金陵自采石翫月乘舟歸赤壁欲上箕山  
首陽巔看白食雪水底眠紫煙又不知在何處漱瑤泉酌霞杯悵  
望不見騎鶴來白也如今安在哉我生恨不與同時死猶喜得見  
其詩豈特文章爲足法凜凜氣節安可移金鑿殿上一篇頌沈香  
亭裏行樂詞此特太白細事耳他人所知吾亦知脫靴奴使高力  
士辭官妾視楊貴妃此真太白大節處他人不知吾亦知歌其什  
鬼神泣解使青塚枯骨立呼其名鬼神驚惟有羣仙側耳聽我今  
去取昆山玉將白儀型好雕琢四方上下常相隨江東渭北休興  
思會須乞我乾坤造化兒使我筆下光焰萬古長虹飛

篋篋引

姜夔

今人抱憾生南鄰賣妻者秋夜難爲情長安買歌舞半是良家婦  
主人雖愛憐賤妾那久住緣貧來賣身不緣觸夫怒日日登高樓  
悵望宮南樹

義獸行

趙汝燧

君不見明皇有象能拜舞看定祿山瞪目怒又不見昭宗有猴能  
起居望見全忠奮臂呼兩朝玩物因喪志異類報國乃仗義天寶  
大駕蜀道巡開平初元唐祚傾百僚奉賊身盡竄宰相畏族神不  
甯爾象爾猴忿且瞋其面雖獸心則人當時節士知有幾壯哉義  
獸不怕死

琵琶引

杜範

人生聚散難爲別何況怱怱作吳越梅梢帶雪下昭陽明朝便隔  
關山月長城不戰四夷平臣妾一死鴻毛輕回憑漢使報天子爲  
妾奏此琵琶聲長安城中百萬戶家家競學琵琶譜酸聲苦調少  
人知食雪天山憶蘇武西風吹霜雁飛飛漢宮月照秋砧衣嫖姚



已死甲兵老公主公主何時歸

堰上行上周憲

吳泳

堰上行桃花灼灼春水生水纔一石泥數斗彌漫泥池浸渠口樹  
以淇園竹蓄以漢堤石石填竹落知幾丁駕作青霓千百尺一夫  
塞焚前一夫荷鋪去旋燒香紙祭水庸更酌春醪賽田祖鹿頭北  
海眼西綿絡一帶填淤肥苧麻漚池禾稻長雖有旱暵無凶飢今  
年狼頭窺井絡羅堰九星幾缺角匪天十風五日雨陸海將貧水  
維濁上帝憫下民親遣蒼水使西門驂前白渠後指畫田塍若鱗  
次新堰舉舊堰修野嫗舍笑谿童謳自言春種皆茁土桔棹長間  
卧畦圃明朝百役非所知且樂豐年踏車舞燕泥新濕花雨斑四  
牡趣向東郊還地平天成九功敘今秋都築沙堤路

古懊惱歌

嚴羽

五兩轉須與相望奈何許寄語黃帽郎船頭慢搖櫓君子如白日  
願得垂末光妾身如螢火安能久照郎郎去無見期妾死那瞑目

郎歸認妾墳應有相思木船在下江口逆風不得上結束作男兒  
與郎牽百丈朝亦出門啼暮亦出門啼蛛網挂風裏遙想無定時  
懊惱復懊惱懊惱無奈何請郎且少住聽妾懊惱歌

劍歌行

贈吳會卿

嚴羽

劍歌行借君劍為君舞自古英雄重結交樽酒相逢氣相許愛君  
倜儻不可羈與君一見心無疑疏眉大額長七尺神采照耀仍虬  
髯雄詞落紙走山嶽霹靂繞壁蛟龍隨如何十載困羈旅此心獨  
未時人知去年從君殺强虜舉鞭直解揚州圍論功不及驃騎幕  
失路羞逐邊城兒歸來寶劍挂空壁白光夜夜驚虹霓椎牛醢酒  
且高會酣歌擊筑焉能悲百年快意當若此迂儒拳局徒爾為我  
亦摧藏江海客重氣輕生

運糧行

劉克莊

極邊官軍守戰場次邊丁壯俱運糧縣符旁午催調發大車小車  
聲軋軋露寒晷短路又滑擔夫肩穿牛蹄脫嗚呼漢軍何日屯渭



濱營中子弟皆耕人

春夜曲

姚鏞

金魚鎖合蘭釭小酒不支愁尋睡早梨花欲墮風更寒燕子不歸  
春自老流蘇護帳香雲結二十六簧清吹咽絨書欲寄湘水深城  
烏啼落花西月

太行道

岳珂

太行羊腸阪九折雲黑風乾尺深雪堇泥道滑木葉寒轆轤車聲  
行復歇華山有馬久脫轅歸來牧野經幾年一從倉箱事居積聊  
以知道煩長鞭前車已覆覆道左天井關頭夜明火後車趣駕開  
井陘唱籌仍復催連營關山青草春二月單軌一冬曾結轍髮脫  
毛落兩膊高引領皮穿眼流血去年搏手雙脊空今年三月甬道  
同可憐努力不敢惜轅下亦覺鹽車通君恩天下示弗服兆野已  
甘借殼疎感恩伏櫪飽秣芻猶為太行憂後車

正氣歌

文天祥

余囚北庭坐一土室室廣八尺深可四尋單扉低小白間短窄  
汗下而幽暗當此夏日諸氣萃然雨潦四集浮動牀几時則為  
水氣塗泥半乾蒸漚歷瀾時則為土氣乍晴暴熱風道四塞時  
則為日氣簷陰薪爨助長炎虐時則為火氣倉腐寄頓陳陳逼  
人時則為米氣駢肩雜遝腥臊汗垢時則為人氣或圍溷浮屍  
或腐鼠雜出時則為穢氣疊是數氣當者鮮不為厲而余以屏  
弱俯仰其間於茲二年矣是殆有養致然爾然亦安知所養何  
哉孟子曰我善養吾浩然之氣彼氣有七吾氣有一以一敵七  
吾何患焉況浩然者乃天地之正氣也作正氣歌一首  
天地有正氣雜然賦流形下則為河嶽上則為日星於人曰浩然  
沛乎塞蒼冥皇路當清夷含和吐明庭時窮節乃見一一垂丹青  
在齊太史簡在晉董狐筆在秦張良椎在漢蘇武節為嚴將軍頭  
為嵇侍中血為張睢陽髯為顏常山舌或為遼東帽清操厲冰雪  
或為出師表鬼神泣壯烈或為渡江楫慷慨吞胡羯或為擊賊笏



逆豎頭破裂是氣所磅礴凜冽萬古存當其貫日月死生安足論  
地維賴以立天柱賴以尊三綱實係命道義爲之根嗟余遘陽九  
隸也實不力楚囚纓其冠傳車送窮北鼎鑊甘如飴求之不可得  
陰房闕鬼火春院闕天黑牛驥同一皁雞棲鳳凰食一朝蒙霧露  
分作溝中瘠如此再寒暑百沴自辟易嗟哉沮洳場爲我安樂國  
豈有他繆巧陰陽不能賊顧此耿耿存仰視浮雲白悠悠我心悲  
蒼天曷有極哲人日已遠典刑在夙昔風簷展書讀古道照顏色

峩眉老人別子歌

謝翱

峩眉有老人奉命過嵩少天風吹西翼冉冉明夕照濕塵紛墮天  
髮白更待報有子爲異物不得入家廟慟哭東南雲相望滄海嶠  
青鳥年年來寄書久不到

烏棲曲擬張司業

謝翱

吳宮草深四五月破楚門開烏啼歇美人軍裝多在船歸來把弓  
墮弓弦越羅如粟越王獻宮中養蠶不作線輓轡出屋井水淺梳

樹花萎子如繭烏棲烏啼宮燭秋越女入宮吳女愁

瓊花引

謝翱

后土祠前車馬道天人種花無瑤草英雲蕊珠欲上天夜半黃門  
催進表酒香浮春露泥泥二十四橋色如洗陰風吹雪欲墮地幾  
人不得揚州死孤貞抱一不再識夜歸闔風曉無蹟蒼苔染根煙  
雨泣歲久遊魂化爲碧

花卿冢行

謝翱

山谷之花卿冢在丹稜之東館鎮至今猶有英氣血食其鄉  
濕雲模糊埋秋空雨青沙白丹陵東莓苔陰陰草茸茸註云是花  
卿古來冢花卿舊事人所知花卿古冢知者誰精靈未歸白日西  
廟鴉啄肉枝上啼綿州柘黃魂正飛

鴻門讌

謝翱

天雲屬地汗流字杯影龍蛇分漢楚二人起舞本爲楚中有楚人  
爲漢舞鸞鵠淬光鷗不語楚國孤臣泣俘虜他年疽背怒發此芒



碣雲歸作風雨君看楚舞如楚何楚舞未終聞楚歌

燕歌行

汪元量

北風刮地愁雲彤草木爛死黃塵蒙  
搖玲瓏將軍浩氣吞長虹幽并健兒  
戈相撥聲摩空雁行兼貫彎角弓披  
腥風捐軀報國效死忠鼓衰矢竭誰  
宣賜金團龍天子賜宴蒲萄宮烹龍  
鍾天顏有喜春融融乞與窈窕雙芙  
客皆王公戟門和氣春風中美人左  
豈知沙場雨濕悲風急冤魂戰鬼成  
行泣

樂府二首

吳龍翰

妾心江上石千古無變更郎心江上水倏忽風波生  
製衣寄夫婿妾有冰雪段中間連理枝不忍剪教斷

冬青花

冬青一名女貞木一名萬年枝漢宮  
嘗植後世因之宋諸陵亦多植此木

林景熙

冬青花花時一日腸九折隔江風雨晴影空五月深山護微雪石  
根雲氣龍所藏尋常螻蟻不敢穴移來此種非人間曾識萬年觴  
底月蜀魂飛遶百鳥臣夜半一聲山竹裂

冬青行二首

唐 鈺

馬箠問曉行南面欲起語野麝尙屯束何物敢盜取餘花拾飄蕩  
白石哀后土六合忽怪事蛻龍挂茅宇老天鑿區區千載護風雨  
冬青花不可折南風吹涼積香雪遙遙翠蓋萬年枝上有鳳巢下  
龍穴君不見犬之年羊之月霹靂一聲天地裂

蠶婦辭

陳 普

東陵採桑婦西陵養蠶女年年役役爲蠶苦桐花如雪麥如雲鳴  
鳩醉樾叫春雨踏踏登竹梯山煙鎖春樹不管鳥臺濕紅霧妾家  
有夫事犁鋤妾家有子尙啼飢春蠶滿筐尙望葉兒啼索食夫已  
歸前年養蠶蠶不熟私債未償眉暗蹙去年養蠶絲已空打門又



南宋文範卷四  
被官稅促今年養蠶嫁小姑催妝要作紅羅襦妾身依舊只裙布  
寒燈補破聊庇軀蠶兮蠶兮汝知否安得繭成大如斗妾生恨不  
逢成周治世春風桑五畝

古樂府

程垣

長安花如錦不堪製郎衣拾得并州翦翦花花忽飛清溪彩鴛鴦  
野性不可馴君心空愛渠渠無愛君心莫嫌秋後扇明年還六月  
淒涼暫離別恩情難斷絕

南宋文範卷四

南宋文範卷五目錄

五言古詩

荆州偶作

楊時

送鄭季常赴太學正

楊時

遷居

洪炎

送模歸卞山并示僧宗義爲余守西巖者二首

葉夢得

懷西山

葉夢得

天聖寺古檜

朱勝非

季微季暉昆仲相繼見訪風姿議論皆慨然有祖風季暉仍

出佳篇見貽語絕不凡且云卽往山中讀書作詩送行

李光

五月七日分韻得食苦筍詩

李光

寄題餘姚徐宰新作嚴公堂

李光



吳帝廟

趙鼎

次韻李公顯

張綱

聞山東盜所謂丁一箭者擁數萬眾臨江破黃州官吏皆保  
武昌江湖閒騷然未知備禦之策感而賦詩

李綱

和陶淵明形影神三首

李綱

夜賦

陳與義

夏日集葆真池上以綠陰生晝靜賦詩得靜字

陳與義

十七夜詠月

陳與義

詠清溪石壁

陳與義

九月八日登高作重九奇父賦三十韻與義拾餘意亦賦十

二韻

陳與義

開壁置牕命曰遠軒

陳與義

再用迹字韻成一首呈判府

陳與義

績溪寨口

沈與求

次韻張仲宗感事

沈與求

白馬渡

洪皓

蔬飯

朱松

餽歲

朱松

別歲

朱松

守歲

朱松

李氏娛書齋

韓駒

防江

張嶠

呈同遊諸公

張嶠

舟中獨夜

張嶠

雨霽出郊外

張嶠

吳縣遊靈巖

程俱



白馬洞

豁然閣

元夕塊坐因用葉翰林去年見寄元夕詩韻寫懷

十月五日集李野家歸作

園居荒蕪春至草生日尋野蔬以供匕箸今日枯枿閒得蒸

菌四五亦取食之自笑窮甚戲作此詩

借居毘陵東門四首

陪李梁溪遊泛碧

登妙峰閣

過黃揚巖

明水達老以黃甘荔子土芋為餉小詩答謝

徙寓妙覺佛舍胥父民襍被相過賦夜坐

靜老通幽軒

程俱

程俱

程俱

程俱

程俱

程俱

程俱

程俱

程俱

鄧肅

鄧肅

孫覲

孫覲

七星巖

西山超然亭

吳漢逸家荆溪蓄古書奇器甚富余欲造觀而未果賦小詩

先之

曾公巖

湖泐上冢繫舟丁山略小憩

雪夜宿致思菴

龍隱巖

城中紀事

王傅巖起樂齋

會稽石道叟教授南劔興治郡學作詩敘其本末

報暉菴

涼月

孫覲

孫覲

孫覲

孫覲

孫覲

孫覲

孫覲

孫覲

呂本中

呂本中

呂本中

呂本中

劉子翬



建康六感

劉子翬

吳

晉

宋

齊

梁

陳

秋懷

新涼

次韻張正民遊智者寺

留別

沈明遠作喆教授用東坡仇池石韻賦予所蓄英石次其韻

初至天台

劉子翬

劉子翬

蘇簡

高登

曾幾

曾幾

炕寢

題巫山神女廟

竹西懷古

天慶觀觀畫龍

三月晦到大庾

和施彥執懷姚進道葉先覺韻

秋興

修修牕前蘆

暮春

延平江上呈吳國華先生

次韻范濟美秋雨感懷

小軒觀月呈興宗叔

從何使君父子遊墨池分韻得名字

宋詩紀事

宋詩紀事

梁溪漫志

宋詩紀事

宋詩紀事

朱弁

唐耜

李易

胡理

張九成

張九成

張九成

鄭剛中

汪應辰

陳淵

陳淵

陳淵

李燾



江月圖

宋詩紀事

登金山

宋詩紀事

歸雲洞

宋詩紀事

述陂

宋詩紀事

檢校園花

宋詩紀事

上清宮

茗溪漁隱叢話

瑞香

林之奇

唐文若

周紫芝

李浩

洪适

洪邁

陳克

南宋文範卷五

長洲顧少卿先生鑒定

秀水莊仲方編

五言古詩

荆州偶作

楊時

鄭公嵇阮流野性本麋鹿平生傲羲皇白首就羈束大寒客無羶  
官冷飯不足顧予支離人攘臂受餘粟江魚尾盈尺飽食勝梁肉  
荆山富樵蘇丈室有餘燠頑疏愧前哲所得踰往躅談經追時好  
俯仰負愧忸流光逝不反愁鬢日改綠世道劫火燃不燼乃良玉  
晚交定難恃雲雨手翻覆官居真遽慮束擔聊託宿求田意雖鄙  
此計正宜速歸尋谷口耕勝賣成都卜坐想帶經鋤倚耒聽布谷

送鄭季常赴太學正

楊時

驅車出西城眷言與君違北顧臨康衢問子將焉之赤驥度渥洼  
終當飲瑤池成都九軌道一躍不可追浮塵暗荆棘捷徑行多迷  
長風戰秋林零落沾人衣青松不改柯期子青霜時



遷居

洪炎

從官三十載故山凡幾歸昔歸尚有屋再歸已傾敝今歸但喬木  
竹落荆薪扉上為烏鳥都下為犬雞棲相從東北隅三畝以為基  
積塊與運甃實畦而培卑成茲道旁舍空我橐中貲堂室敢即安  
戶牖適所宜嘉樹三四株當牕發華滋馨香入懷袖似與遷徙期  
我今六十老豈不知前非咨謀愚見拾就列筋力微竊食奉祠祿  
永負伐檀詩松楸幸在望鄰曲不見遺角巾隨里社庶以保期頤  
送模歸卞山并示僧宗義為余守西巖者三首

葉夢得

自我離山閒忽已兩改月飢人不忘食未坐先已說家僮挾書至  
驚起慰愁絕推尋到雞犬問訊窮曲折此生豈多為一壑萬慮滅  
可能復大錯更鑄八州鐵江東領汝歸馬蹄輕初不恨觸熱慙  
報松竹吾豈成久別  
端居探幽奇自謂略已徧昨登西山嶺雄絕昔未見溪湖莽吞吐

雲物紛百變乃知十年閒尙或遺勝踐巢成輒棄去我豈秋社燕  
築南山絕頂亭  
基垂成而來為我課僮僕開闢盡二面莫言羊腸險徑小煩屢

轉杖藜不用扶吾腳猶爾健

生長在山閒從公守蓬戶人言膏粱子粗免污紈袴官居無多戀  
暫止復遽去家法恐未傳此心良已素義禪晚從我似識此閒趣  
西巖鬱嶽岑久斷俗子路聊持山中節為我主留務封陞際湖海  
雲月皆所部

懷西山

葉夢得

西山十畝強高下略不齊嵌空抱奇秀上有凌雲梯架屋八九間  
茅簷敢辭低所欲面勢好老稚通扶攜密竹轉修徑老松故成蹊  
仲冬景氣肅碧草猶萋萋仰視天宇大四觀渺回溪徐行信足力  
未畏成顛躋周意各有適孰云無町畦平生幾濡首末路乃噬臍  
不作巢幕燕肯從觸藩羝胡為濫麾鉞坐聽鳴鼓鼙外物委蟲臂  
全生思馬蹄可能三徑草歸路老更迷



天聖寺古檜

朱勝非

雷霆起蟄虬天矯勢欲上忽然化此木尚作拏雲狀婆娑枝幹垂  
生澀紐結壯圖經不能記父老那可訪晉杉定儕類蜀柏豈輩行  
櫟夢何足神槐語固已妄自無斧斤憂未始疑大匠

湖州府志

季微季暉昆仲相繼見訪風姿議論皆慨然有祖風季暉仍  
出佳篇見貽語極不凡且云即往山中讀書作詩送行

李光

吾鄉顧虎頭千里飛食肉名參慶歷賢罪入元祐錄堂堂想儀刑  
凜凜見眉目百年議論定奇禍反為福森然見諸孫刻厲如白屋  
我觀宣和間權倖互當軸一時名家子半為閹宦辱暫時得富貴  
卑賤等厮僕君家賢伯仲抗志守先躅幽情寄鉛槧雅尚在松竹  
僧房忍朝飢雪牖耽夜讀訪我五松山懷袖粲珠玉嗟余久放浪  
歲晚守窮獨閉門雀可羅三徑草常綠依山結衡茅一飯共脫粟  
呼兒具晚餐山肴雜野菽對案笑復顰負我十圍腹去去樂琴書

山中芋魁熟

五月七日分韻得食苦筍詩

李光

此君凌雲材節葉貫霜雪千林富東南百種自區別前後互萌芽  
一一調苦舌貓頭效藟鬼竹箭資瓊屑世方嗜柔腴我獨甘苦節  
幽姿照七箸挺特似英傑定非淇園裁要是首陽葉侯門厭珍烹  
鼎俎雜葵蕨安能知正味但欲取容悅何當薦君盤茹苦資激烈  
欲雪會稽恥志豈在餽歎甲卒五千人猶能霸吳越

寄題餘姚徐宰新作嚴公堂

李光

子陵古真隱逸氣橫九州平生江海志自比巢與由鴻飛本冥冥  
肯為稻粱謀虛屈萬乘顧枉煩物色求貽書謂君房預作腰領憂  
舜江公邑里公去踰千秋青山無古今大江日東流人物浪淘盡  
英名至今留當年漁釣地陳迹餘荒邱徐侯有佳政百里安田疇  
作堂名嚴公懷賢慕前修時來對江山一尊更獻酬我豈隱淪歟  
三黜今白頭年來賸得閒忘機狎羣鷗結茆牟湖旁一竿幸可投



窮笠青蓑衣生涯寄扁舟嚴子定不死吾將從之遊

吳帝廟

趙鼎

阿瞞鬼之雄掌握弄神器孫劉相繼踵分爭足鼎峙支吾僅自保  
終作降囚係智力非不如亦各論其地吾聞隆準公幾為強楚斃  
轉粟收散兵正賴關中勢中原乃腹心四肢吾所制英雄建立初  
豈但夸一世處之或不然果非長久計古人今復生此論無以異

次韻李公顯

張綱

士有鴻鵠志萬里一舉翻胸中有廊廟肯顧三畝宅李侯氣邁爽  
詞鋒凜霜戟老夫晚結交文會欣有繹劇譚到時事唾手欲任責  
襤褐天路高畎畝抱忠赤風雷惜變化泥蟠等蜥蜴結茅西山下  
樵爨走僮獲富貴會有時簞瓢豈不適世態翻覆手寧較黑與白  
興來時一杯南牕俯遙碧

次韻和陶淵明形影神三首

李綱

形贈影

大塊已載我何如未生時氣變芒芴間七竅誰鑿之百骸與九藏  
假合以成茲與子非故交從我如相期屈伸及動止契合初不思  
常恐隨物化念此情淒沍我生夢幻中變滅不復疑安得永相保  
聽我悲來辭

影答形

紆餘非我妍濩落非我拙與子兩相依生來無間絕俯仰隨顧指  
豈是事容悅因光長周旋處陰暫睽別況復同物化子壤我亦滅  
冥冥長夜臺念之五情熱願子衛生經無使精腦竭千載永相從  
彭殤孰優劣

神釋

人生若大夢積微以成著少壯得老死一念即非故二子異金石  
松蘿暫依附胡為羨久生切切兒女語有形會當滅是影無實處  
惟我謝客塵妙湛乃常住不入造化機豈墮陰陽數迴光試返照  
凡聖悉皆具不滅亦不增誰毀誰復譽超然外死生卓爾無來去



周行萬物表獨立初不懼二子非吾徒安用多憂慮

聞山東盜所謂丁一箭者擁數萬眾臨江破黃州官吏皆保

武昌江湖間騷然未知備禦之策感而賦詩

李綱

時危貴權謀盜賊本王臣招來駕馭之自足張吾軍蠶蠹固有毒  
犀象亦可馴恩威倘得所摩拊還其淳光武制銅馬曹公用黃巾  
資其戰大敵且以蘇良民去年議招撫乃以此義陳置司未閱月  
來者如屯雲奈何力沮罷坐使復紛紛傳聞中原寇鐵馬動成羣  
虎兕出於柙玉石同其焚京輔困抄掠遂及江湖濱東南久平定  
郡縣無城闔天塹非不險誰與守要津古來重鎮地控扼非其人  
小敵已震懼大者當何云人謀自回適天意詎不仁安得迴陽輝  
一令四海春

夜賦

陳與義

泊舟華容縣湖水終夜明淒然不能寐左右菰蒲聲窮途事多違

勝處亦驚心三更螢火鬧萬里天河橫阿瞞狼狽地山澤空崢嶸  
強弱與興衰今古莽難平腐儒憂平世況復值甲兵終然無寸策  
白髮滿頭生

夏日集葆真池上以綠陰生晝靜賦詩得靜字

陳與義

清池不受暑幽討起予病長安車轍邊有此荷萬柄是身唯可懶  
共寄無盡興魚遊水底涼鳥語林間靜談餘日亭午樹影一時正  
清風不負客意重金贈聊將兩鬢蓬起照千丈鏡微波喜搖人  
小立待其定梁王今何許柳色幾衰盛人生行樂耳詩律已其賸  
邂逅一尊酒他年五君詠重期踏月來夜半嘯烟艇

十七夜詠月

陳與義

月輪隱東峯奇彩在南嶺北崖草木多蒼茫映光景玉盤忽微露  
銀浪瀉千頃巖谷散陸離萬象雜形影不辭三更露冒此白髮頂  
老節無前遊危處有新警澗光如翻鶴髮態發遙境回首房州城



山中夜何永

詠清溪石壁

陳與義

清溪宜曉石曲處千丈晦天開蒼石屏影落西村外虛無元氣立  
明滅河漢對人行崢嶸下鳥急浩蕩內向來千萬峯瑣細等蓬塊  
老夫倚杖久三歎造化大惜哉太史公意短遺此快更欲訪野人  
窮探視其背

九月八日登高作重九奇父賦三十韻與義拾餘意亦賦十

二韻

陳與義

九日風景好節意滿天涯書生尊所聞登高亂城鴉雖無後乘麗  
前驅載黃花雨樓壓波壯眾澤分天斜居編驚有苗訪古悲章華  
蕭條湖海事勝日一笑譁興移三里亭木影雜蛟蛇二士醉藜杖  
兩禪風袈裟奇哉古無有未覺欠孟嘉天公亦喜我催詩出微霞  
賦罷迹已陳憂樂如轉車卻後五百歲遠俗增雄誇

開壁置牕命曰遠軒

陳與義

鍾妖鳴吾旁楊獠舞吾側東西俱有礙羣盜何時息丈夫堂堂軀  
坐受世褊迫仙人千仞岡下視笑予厄誰能久鬱鬱持斧破南壁  
窗開三尺明空納萬里碧巖霏雜川靄奇變供几席誰見老書生  
軒中岸玄幘蕩漾浮世裏迢迢送茲夕倚楹發孤嘯呼月出荒澤  
天公亦粲然林壑受珠璧會有鶴賀賓經過來見客

再用迹字韻成一首呈判府

陳與義

風雨一葉過黃花已陳迹人貧交舊疏歲暮日月疾貪人積胡椒  
智不到鬼錄那知庾郎菜地瘦飽金玉不如學服氣清坐了晨夕  
尚餘烟月債驅使入吟筆晚逢葛先生憐我出無僕借車得時詣  
謬窺文字籙談詩不知疲或作夜半客揮毫寫珠玉治郡益餘力  
不羨江千萬不慕李八百願傳公句法容我附風翼城東劉子政  
著書方滿屋昨示一篇詩三日歎未足仍聞供筆硯家有樊通德  
但恐裴公門從此近舍湜

績溪寨口

沈與求



青嶂插天塹白水翻地軸回環壯哉縣不許飛鳥觸往來羽書馳  
盜發青溪曲先聲雜妖幻餘黨萃符祝控攘最旁近被害良慘毒  
聚落烟盡空生齒塗炭酷豈無山川險會有法令束百年不用武  
駢領甘此辱至今風雨夜猶聞鬼羣哭遺俗感舊憤禦盜勇氣足  
大兒佩刀劔小兒利鋒鏃老翁筋力衰奮挺怒張目營寨人自成  
不待官期促矧今天驕橫灑涕國步蹙豺狼據道路虎兕出林谷  
倘持復仇心公戰圖報國

次韻張仲宗感事

沈與求

諸侯救周衰能事存筆削後學競專門膚引迷注腳寧知懼賊亂  
誅意未爲虐上皇志包荒大度示恢廓誤墮虜計中九廟施箭鏃  
將臣擁強兵首鼠事前卻專雄懷顧望散黨失歸著坐令兩宮車  
北轅狩沙漠天王紹絕統憤此國勢弱嘗膽復大仇此意良不薄  
向來督真姦國典猶闕略羣公爭護前循習久彌確黃屋泛滄溟  
黔首寄增繳世無管夷吾老眼雙泪閣何當誅賞行浩歎成嗚噎

大明還中天冰雪自銷鑠

白馬渡

洪皓

國步日多事霜露任霑衣流落十五年至今方北歸繚繞一萬里  
人物大半非昔時渡盟津賓從爭扶持茲辰渡白馬陰曠日無暉  
一酬祈利涉馮夷莫予違驚秋感葉脫况乃思鱸肥父老行歎息  
風雨仍霏微夜投胙城宿百里卽王畿遙望一惆悵何當拜天威

蔬飯

朱松

蕨拳嬰兒手筍鮮籜龍蜨薦羞杞菊開采劬烟雨外嗟予飯藜藿  
咽塞舟泝瀨朝來二美兼一飽良已泰充腸我誠足染指客應慨  
平生食肉相蕭瑟何足賴王郎催牛炙韓老憶鯨鱠俠氣信雄夸  
戲語亦狡獪我師魯顏子陋巷翳蓬艾執瓢不可從一取清泉醉

餽歲

朱松

歲晚追土風獨甕誰與佐人心感流光臺餽屏奇貨雞豚取牢柵  
門戶隨小大去鄉二十年憶此但愁臥兒癡元未識但索梨釘坐



何時鷓鴣識村莫非驢轉磨不須志四方教子求寡過歸哉及強健  
老去煩劑和

別歲

朱松

舊歲已趣駕爲我不少遲凡心畏增年而歲豈容追丈夫有螻屈  
牢落天南涯收功英妙年豪傑彼一時寧當如秦越坐視瘠與肥  
鄰翁意誠厚酌酒寬愁悲慙慙何時忘祝我致好辭撫世非吾事  
諸公正扶衰

守歲

朱松

庭燎夜未央旌旗煥龍蛇九門一放鎖萬馬誰能追亂離憶舊事  
安眠夢無何日炫燈燭光坐厭兒女譁念此亦土風雖癡不容搨  
更爲盧白戲紛爭起橫斜故歲不作計新歲莫蹉跎努力誦書史  
從人笑翁誇

李氏娛書齋

韓駒

欲樂証凡夫須臾皆變壞唯書有真樂意味久猶在李君名家流

事業窺前輩澹然無他娛開卷與心會憶吾童稚時書亦甚所愛  
傳抄春復秋諷誦晝連晦飲食忘辛鹹汗垢失盥頰爾來歡喜處  
乃在文字外卷藏二萬籤棊几靜相對此樂君未知狂言勿吾怪

防江

張嶠

大漠與吳越天南天北頭虜猶陟吾地飲馬長淮流飲馬猶是可  
莫使學操舟

呈同遊諸公

張嶠

眾嶺莽回互古剎藏喬林平川一目盡列岫千里深昔人幾經歷  
我輩復登臨山川諒不改徒傷懷古心

舟中獨夜

張嶠

泊舟依聚落水色澹餘輝紅樹滿秋山夕烟上霏微稍觀漁火明  
漸見行人稀孤客畏遙夜况乃窮秋時疏篷見天星朔風左右吹  
重衾不能暖輾轉枕屢移懷歸意戀戀感舊心悽悽驟使百慮集  
起坐復搢頤人生諒多牽吁嗟竟何爲



雨霽出郊外

張嶠

時雨當夜來出郭喜新霽佇立望四郊春容莽無際羣山隔大江  
蒼巖澹相對輕風生水波微露滋花氣綠津柳已暗忽悟清明至  
融怡歲序同俯仰河山異逢時思墳墓拜掃十年廢聞有故童僕  
壺餐酌荒隧新阡固已遠龍輜向天外已深濡露悲更下孤臣淚

吳縣遊靈巖

程俱

春物已如許放舟出橫塘扶橈漾淥漲迨此白日長草木有佳色  
欣欣弄浮陽幽禽靜相呼乘和自翻翔春風不著人浩浩吹我裳  
終年思煩促於此興未央捨舟得平地陟彼萬仞岡明霞墮山西  
夜氣鬱已蒼豈無從我遊夾道鬚鬢張風來得好語落落隨低昂  
幽堂掃禪榻靜對燈燭光身輕浴新出境寂慮欲忘虛牕忽含曉  
睡起日照梁羣山發春姿秀碧澹以芳晨光晞薄露草樹滋幽香  
徜徉尋昔遊步屨循長廊振衣一長嘯寸目了八荒上嗟百世基  
竟坐一笑亡當時館娃地今作選佛場乃知諸夢境遁化豈有常

飄然詠歸歎此適頃未嘗重來曾有興肯使墮渺茫旁人挽子言  
借問身閒忙吾方有公事子去無相妨

白馬洞

程俱

披榛不知疲詰屈巖下路俄然見深窵蹻步入巖戶一泓竊而澄  
百步清以驚人言紫髯仙白馬從此渡磷磷盡赤石丹竈遺滓汚  
收藏已兒啼效速勝麻護因知世盲聾荒怪雜疑誤虛空如許大  
長嘯可平步胡為萬山底躑躅向烟霧

豁然閣

程俱

雲霞墮西山飛帆拂天鏡誰開一牕明納此千頃靜寒蟾登澹白  
一雨破孤迥時邀竹林交或盡剡溪興扁舟還北城隱隱聞鐘磬  
元夕塊坐因用葉翰林去年見寄元夕詩韻寫懷

程俱

兒童逐遨戲先春禱春晴心如飄風快目若冰壺明寧為惜日計  
所願佳節并老來見紛麗如乾闥婆城流光不可挽譬彼空中聲



那知節物佳，翛然謝將迎。幽燈對簡編，歷歷記所更。斯須閉關臥，鼻息驚雷鳴。寤念北山北，田家已催耕。胡為異鄉久，空寒猿鶴盟。短日良易暗，凝陰有時晴。何人勸之照，燭燎皆爭明。今年春苦寒，寒威劇幽并。連綿積三白，雲埋闔廬城。深泥積新雨，行路無人聲。藜燈不來下，算卜豈復迎。朝來日照梁，天氣忽已更。稍聞橋市間，簫鼓遠近鳴。吳人尚遊樂，急如赴春耕。唯有窮巷士，守窮如守盟。

十月五日集李野家歸作

程俱

賢愚孰無營，急景信可惜。如何闔廬城，乃有此閒客。懷安豈初志，運甕有餘力。相從無何鄉，邂逅一日適。虛牕得朝陽，寒凜作春色。琴書羅棊几，一一淨如拭。畫沙見奇蹤，落屑非近識。似追永和還，未覺正始隔。崢嶸衡霍圍，蒼莽雲夢澤。時華泣低昂，幽鳥共深寂。誰驅此變幻，戲納方丈域。慚公慶春釀，澆我憂思積。豈無車公語，謂方顧匪伯仁匹。長檠蠟華摧，起視霜月白。酣歌美清夜，擁髻侍通德。參差吐幽妍，鑿落艷芳碧。觥籌不留行，為問此何夕。言歸謝

主人五斗安可極

園居荒蕪春至草生日尋野蔬以供七箸今日枯枿間得蒸

菌四五亦取食之自笑窮甚戲作此詩

程俱

平生囁嚅口，出語無媚悅。定非食肉姿，賦分在藜藿。僑居得空園，窮陋亦清絕。分陰豈不惜，飽睡送日月。蕪菁不須種，眾草今已茁。朝來一雨過，青細皆可掇。東籬有更生，杞枸僅堪埒。乃知天隨生，豈羨五鼎列。堂萱不吾負，芽甲破春雪。糜身薦瓢箪，解我憂思結。薺花雖未繁，著地爛於纈。驚雷發蒸菌，自可當夏鼈。馬蘭亦芳脆，人莫固凡劣。晴朝當炙背，俯僂事挑抉。家人各盈檐，汲井手自挈。滿炊太倉陳，脩以冬韭列。盤中長闌干，置饋每虛撤。恨無籜龍苞，此味那得闕。長謠青青槐，饒液想庭樾。妻孥復相誚，男子志勳烈。君非老浮圖，菜本可長嚙。况茲閒草木，豈為刀匕設。乃翁笑摩腹，萬事付一呷。此中有真意，勿為兒輩說。

借居毘陵東門四首

程俱



客去不能寐，翛然清夜闌。樓居撫長川，仰視天宇寬。長川濯雲漢，錯落星宿寒。青燈固可親，且還對塵編。其人肉已朽，千載與我言。掩卷三太息，虛簷清露漙。

急景不可挽，吾生豈無涯。吳中十年舊，鬚鬢亦已華。嗟我壯且老，方知失林鴉。欲歸巷無廬，欲駕塗無車。而子亦羈滯，心事如蓬麻。人生無巧拙，命爾將如何。吳中十年舊，謂傅冲益。

倚倚隔河樹，羃羃緣階草。時當長養候，顏色豈不好。萌芒忽枯葉，茂大旋枯槁。滔滔不自知，但見壯而老。人生亦草木，萬化迭侵擾。朱顏日夜變，素抱豈自保。

借居臨官道，堂陰俯長河。前車接來軫，後棹紛相摩。我獨居其間，超然嘯而歌。頗從故人語，安用高軒過。旁有五畝園，不知主誰何。時能曳屣往，豈異吾山阿。

陪李梁溪遊泛碧

鄧肅

涼天夜無雲，寒江秋更碧。冷照月華中，水天一色畫。船渺中流

三更羣動寂，清風遠相隨。蘆花秋瑟瑟，近山得桂香。隔烟起漁笛，樓臺半有無疑。是化人國，我生本無事。釣竿勤水石，今宵更可人。仍侍君子側，浪登元禮舟。本非謫仙敵，斂手看揮毫。光芒騰萬尺。

登妙峯閣

鄧肅

維舟古木陰，故人能倒屣。相攜步高閣，千尺誇雄偉。雨餘天氣清，宇宙空如洗。對面碧玉峯，去天不盈咫。憑欄一超然，欲搏九萬里。下視囂塵間，蠢蠢魚蟲耳。平生浪自苦，馬上肉消髀。匆匆欲何之，燒香更隱几。八夜寂無人，波聲欄下起。坐覺非塵寰，雷霆生腳底。

過黃揚巖

鄧肅

朔風夜號空，于喁幾枝木。深山自春色，芳草不凋綠。朋來得佳遊，招提藏翠麓。新酒赤如丹，竹萌肥勝肉。一醉出門去，缺月挂修竹。歸路沙溪淺，危橋踐寒玉。夜過涓濱居，門庭故不俗。對坐寂無語，泉聲如擊筑。宗盟更可人，相邀勤秉燭。開緘得捷音，豺狼俱面北。迴棹今可矣，賞心嗟未足。西去有奇巖，佳名配土屋。箕踞列十人。



未充空洞腹更約林宗俱來伴白雲宿

明水達老以黃甘荔子土芋為餉小詩荅謝 孫覲

客居莽牢落幽絕無四鄰歲窮有衣結日晏猶甑塵偏仄戎馬間  
敢厭薪水勤故人情義重采采青泥芹小摘持寄遠分餘為情親  
丹荔擘輕圓黃甘破芳辛蹲鴟勸加餐風味亦可人渺渺山澗曲  
浩浩水雲晨踞爐有前話兩翁對然薪眼纈紅綠共此無邊春

徙寓妙覺佛舍胥父民襍被相過賦夜坐 孫覲

客居厭窮獨蓬艾翳環堵莊舄尚越吟鍾儀猶楚語吾人有奇操  
空洞見城府相逢逆旅中霧豹初一睹拘囹賦囚山避謗憎市虎  
寒裳肯過我崖嵩走風雨微吟對清夜破此五月暑墜露浥金莖  
空花墮犀塵孤燈映籠紗冷燄翳復吐耿耿遂不眠逢逢聽晨鼓

靜老通幽軒 孫覲

諸峯倚崔嵬眾壑隱犇峭寓日欣有賞會心領其要開廬結茆竹  
伐翳斬蓬藿此君亦可人玉立畫娟妙風酣醉相倚月吐清自照

竊渺非世音鸞鵠中夜嘯烟塵闔北關烽火避南徼便欲老三閭  
終焉隱屠釣

七星巖 孫覲

十載汗修門簪橐侍帝垣五雲深莫窺眾星拱一繁一坐贖背書  
身落海上村山川發餘想鐘鼓眩昔聞星圖煥斗極兩兩錯地文  
今日復何日乘槎造天閨日月起可挾參井立能捫誰當揭其柄  
為我酌瀛尊

西山超然亭 孫覲

厖區翳榛莽地瘴藏百怪西山何軒軒拔腳風塵外中縈一線蟠  
側立兩壁對旁連九疑高遠控三湘大孤亭坐林杪俯見飛鳥背  
號方泣三女禦魅竄四罪誰去窘囚拘故自脫天械飄飄思凌雲  
萬里風雨會

吳漢逸家荆溪蓄古書奇器甚富余欲造觀而未果賦小詩  
先之 孫覲



高人臥江海烟雨三家村白眼憎俗徒青山自當門披圖望千載  
耿耿尚自存金鑄腰裏蹄漆書科斗文虬螭盤六印犧象刻四尊  
劔包虎皮斑琴漫蛇腹紋猶吐星芒寒尚帶雷斧痕我亦望古者  
昂昂真戴盆儻未倚門揮應許置榻論從公問奇字載酒過子雲

曾公巖

孫覲

羣峯依天立萬馬屹不動風敲紫玉珂雨暗青絲鞵相君千里目  
渺渺孤鴻送披雲觀天巧鑿翠出巖洞中空貫長虹側立剖大甕  
宛宛臥石梁欲起時地控玉棺已上天甘棠有遺誦獨餘澗底泉  
時與幽人共

湖汭上冢繫舟丁山略小憩

孫覲

清谿三百曲一片春風綠茆屋有人家窈窕闕深竹老去耽田里  
寓日快新矚風漪卷翠綃雲巘鏤蒼玉尋盟喚白鷗解佩贈黃犢  
獨笑無一人傳聲滿空谷

雪夜宿致思菴

孫覲

霏霏竹間雨練練松上雪誰遺碧玉壺化作白雲闕孤懷愜幽欣  
一笑暖栗冽寒光注老眼謂是山吐月耿耿清不眠夜半聽竹折

龍隱巖

孫覲

跳波觸石喧古木抱崖擁老蛟厭泥蟠一笑作潭洞孤峯起峭崿  
哀壑浩呼洶腥風噤蛙淫東雨落毛毳凜凜白晝寒瘴髮立盡聳  
早氣曛日黃縮爪但隱拱悠然四大海斂此一毛孔安得化為霖  
蕙葉有光寵時禱雨未應

城中紀事

呂本中

生平足艱窘可歎不可言兩遭重城閉再因羣盜奔今茲所值遇  
我豈不與聞脫身保兒女恐辜明主恩旁皇不忍去敢計生理存  
昨者城破日賊燒東郭門中夜半天赤所憂驚至尊是日雪政作  
疾風飄大雲十室九經盜巨家多見焚至今馳道中但行胡馬羣  
翠華久不返魏闕連妖氛都人向天泣欲語聲復吞我病未即死  
爾來春既分剝床供晨炊兩眼烟已昏豈無好少年可與其殊勳



志士或不恥有身期報君塞水須塞源伐木須伐根子莫笑短拙  
荆蠻生伍員

王傳巖起樂齋

呂本中

人生各有樂所樂故不同吹竽與擊缶同在可樂中孰能識至樂  
不計窮與通顏子在陋巷肯憂家屢空朝從聖師遊暮歸無近功  
忽然若有合此樂固無窮當時二三子因之開蔽蒙君生百世下  
久已聞其風端居有遐想客至聊從容四壁倚蓬蒿萬卷蟠心胸  
回視世所求天道迷西東此樂既不遠欲往吾其從

會稽石道叟教授南劍興治郡學作詩敘其本末

呂本中

聖遠道則微世久學欲絕區區續微言未易勝邪說石侯東南秀  
睹此心欲折分教南劍州意在補亡缺歛今兵火後復見俎豆設  
廟貌甚尊嚴上下有區別先生默無語風化動閩粵斯文自明白  
如仰見日月坐令穿鑿悞不待湯沃雪不知旁祠誰今代古豪傑

孰能與之齊其此歲寒節入門日在望未返意已竭由來正心術  
不在費頰舌乃知薰陶功自與聞見別參魯回不愚亦豈有優劣  
此理倘可求萬古同一轍

報暉菴

呂本中

春草仰生活春暉常照臨不知欲報德何以見此心江漢有時竭  
此心無淺深魏氏有令德傳家非獨今結庵在山阿日瞻松柏林  
仁風被遠邇猛獸不敢侵令子守直道奇往無寄嵌遂令此鄉人  
得聞金玉音我行時序晚回望西山岑延頸長太息聊爲純孝吟

涼月

劉子翬

涼月未出山浮雲半空白徘徊步軒牕宛若待佳客經林漏飛輝  
映澈生華澤及茲秋景清吾廬更幽寂殊觀發祕藏妙聽生寥闌  
營營息初機炯炯懷新得豈無平生心所樂已非昔天旋河漢動  
夜久鄰機息淒淒感庭蘭歲莫霜霰集呼兒溫濁醪獨酌醉永夕

建康六感

劉子翬



吳

龍翔大耳兒虎視捉刀人風雲競追逐逸軌誰能遵大皇負英材  
沈潛歛求伸一呼定南國再戰威強鄰抗魏既搖岳攘劉亦披鱗  
組練繞平隰艤艫蔽通津偉哉人物盛成功豈無因代祀已飄忽  
風流久彌新停橈眺迴陸裂蔓登層閭臥龍昔來遊萬古懷清塵

晉

日昃無全照南遷事倉忙龍謠方協瑞星禍已告亡凌遲百年運  
凜凜危莫將向來問鼎人項背常相望環宮白羽列面闕鳴弦張  
膺圖未躋泰卜世豈在長獨憐短轅公推刃殺忠良百身嗟莫贖  
一慟鬢成蒼時移事亦更為宋復為梁惟有采石潮年年到前岡

宋

寄奴真偉人落拓龍潛地據筵呼五木已有吞世氣世期值陽九  
天綱日淪替偏邦或跨州卑號猶稱帝匪乘艱棘運英姿疇能濟  
南戡奠番禺西狩澄涇渭功雖與世隆道亦因人廢緬懷揖讓風

黃屋身如寄頽波日奔迫夜壑遷神器巢由獨賢哉高蹤邈南繼

齊

堯宮不翦茨禹室無崇壤巍巍天步隆萬代猶可仰荒哉二三君  
經營務華敞落柿滿清江飛斤般遙響疏淵引瀾澳築圍遷林莽  
筋力弊民軀貨財傾國帑雄心獨未倦矯首生遐想時徂陵谷變  
無事猶悲曩殷憂夜興懷逸樂難終享過客問青樓荒畦棘一作雜  
花長

梁

開圖屬英睿失國由昏悞斯人異前修撥亂旋致亂輕刑下益肆  
厚爵臣彌叛聰明馳萬機精苦徒宵旰鳳冕敬方袍鸞旗游彼岸  
悠然弃從懷臨機復難斷那知千佛力不紓一寇難酒色覆商周  
神仙蕩秦漢趨亡固多軌荒迷卒同貫微聖常鮮終撫冊三慨歎

陳

悲風嘯荒垣歌斷庭花曲壁月夜沈輝瓊樹春銷馥郊圻遊從盛



想像猶經目麗景明新妝清波映鮮服承恩屬令姿被選皆華族  
朝從結綺遊暮向臨春宿意高時忽謝步遠塗方促榮華事不長  
哀樂情難足悠悠六朝事轉盼風驚燭永懷興亡端斯文慚麗縉

秋懷

劉子翬

哲人嘆逝川志士悲廩秋流光不暫停忽忽歲欲周涼飈襲迴野  
飛霜皓盈疇華林失鮮輝奔溪般湍流萬化儻日徂吾生難獨留  
而我苦不樂彷徨復何求世途多軌轍今行非昔謀徒遵耿耿意  
齟齬固莫投時乎不再來豈余敢懷尤王道炳日星歷聘疲軻  
歸與既改旆浩然亦回輶寂寞宵子歌棲遲長卿遊客嘲徒自解  
天問終不酬長揖未免烹說難竟遭囚行藏或大謬聖賢共悠悠  
含思疚恆積念往川途修煌煌青春姿蹉跎恐茲由諒非宏達觀  
那能齊百憂

新涼

劉子翬

新涼爲招客勝集非預圖前峯雨未散冷風遠吾廬披襟沐清駛

合席隨沾濡定知喧譁中欲此一快無興來擴以酒草具來須臾  
田翁偶過我添杯坐其隅爲言秋暑劇稻畦日凋疏甍辭抱甕勞  
僅給園中蔬喜茲甘澍足普潤無遺墟迤山莽難分綠浪搖虛徐  
我病不任耕歲收仰微租蒙成每自愧一飽便有餘連觴使之醕  
醉語雜叫呼野人無他腸我輩恐不如

次韻張正民遊智者寺

蘇簡

養拙何所詣白晝門常關剝啄有好懷遶郭橫秋山佛刹在山麓  
清淨非人間曳杖得晤語幽尋爲歡顏寺同喬木古僧與白雲閑  
一鳴不復鳴流泉自潺湲山林作勝踐世事羊腸艱

金華詩粹

留別

高登

丈夫四方志肯作兒女別顧我蹉崛強羨君真秀發道義重千鈞  
名利輕一葉壯風吐虹蜺忠誠貫日月插劒露肝膽看鏡念勲業  
何當拔茅茹同在陳力列

沈明遠作詰教授用東坡仇池石韻賦予所蓄英石次其韻



曾幾

維南有絲溪溪石如水綠瞻相百里間抱負一夫足聲名作灾怪  
攻取及背腹在者略無奇溪神為顰蹙烟瘴雨地故舊實州牧  
坐令數峯青飛過大江濱何嘗說向人恐類和氏玉公然遭奪攘  
不使得藏伏廣文到吾廬索隱妙著卜東坡韻險艱句句巧追逐  
幽人所好山已占一林谷又兼小崢嶸無乃太多欲端如耐久朋  
相與會心曲大勝輕薄兒浮雲變何速

初至天台

曾幾

疇昔所欣慕天台冠坤靈興公妙摹寫粲若披圖經自憐嬰世網  
仰愧鴻冥冥夙昔諒非淺半生吏金庭成此一段奇得按東吳刑  
又分臨海竹想像山圍屏稍稍向鈴閣行行叩禪局一邱與一壑  
所見皆所聆石梁臥劒戟布水驅雷霆五百大開士神光秘林壑  
于我定不薄是事初無形寒岳二隱者在眼誰能青庶幾閭邱守  
胸次明渭涇向來石礪耳鬪訟終朝聽淨洗塵俗狀數上參雲亭

炕寢

朱弁

風土南北殊習尚非一躡出疆雖仗節入國暫同俗淹留歲再殘  
朔風滿崖谷禦冬貂裘敝一炕且踞伏西山石為薪黝色驚射目  
方熾絕可邇將盡還自續飛飛湧元雲燄燄續紅玉稍疑雷出地  
又似風薄木誰容鼠淒冰信是龍銜燭陽曦助喘息未嘗搖空腹  
惠氣生袴襦仍工展拳足豈惟脫膚鱗兼復平體粟負暄那用詫  
執熱定思沃收功在歲寒較德比時燠雖餘炙手焰寧有爛額酷  
矧當疑沍晨炎帝獨回轂元冥真退聽祝融端可錄嗟予亦何者  
萬里歌黃鵠偃仰對牕扉妍暖謝衾褥壯懷修竈媚晚悟笑突曲  
因思墮指人暴露苦皸痂頻年未解甲蹈此鋒刃毒遙知革輅中  
盱食安豆粥陪臣將命來意懇誠亦篤有奇不能吐何術止南牧  
君心想更切臣罪何由贖此身雖自温此志轉煩促論武貴止戈  
天必從人欲安得四海春永作蒼生福聊擬少陵翁秋風賦茆屋

集中州



題巫山神女廟

唐 韜

楚澤隱巫山翠壁開鴻濛萬流束長峽怒浪日簸春朝暉澹高唐  
岳阿閼彤宮罍思散烟霧榮光繞長虹恭聞雲華君少陰體冲融  
受道紫清闕飛花凌三空徜徉江海上千騎馳蒼龍羽節回天津  
央央弭層峯悽惻下土人昏墊無所容寶書授神禹百靈倏奔從  
蛟螭委鞭策山川奠西東九州免為魚遂成萬世功嗟余晚聞道  
蓬心蔽崆峒維舟垂崖邊再拜望遺蹤嶠山頭石雲衣尚溶溶  
縹緲玉瑛臺如在指顧中童律不可問至言誰擊蒙仰首天壇下  
松柏悲回風名勝志

竹西懷古

李 易

淮南昔繁麗富庶天下稱管絃十萬戶夜夜聞喧騰不待竹西寺  
歌吹相豪矜一朝烽火急屢市為溝塍風月無歡腸睥睨皆射期  
荒荒野月白照地如寒冰自從畫江守歲歲輸金繪蕭條閭井閒  
水旱又頻仍我來經過里日暮此一登隋唐倏已往遺跡幾廢興

江山極蒼莽望之涕沾膺

揚州府志

天慶觀觀畫龍

胡 瑄

道人龍中來醉與神物會寫茲蜿蜒質日月為暝晦崩翻江海姿  
素壁起濤瀨呼吸見雌雄抉石疑可碎蕭森殿陰古眾真儼飛旆  
注觀恐騰躍夜半失像繪飛光者明珠靈秘一何怪爛爛照豐棟  
那得久在外偷兒伺酣睡不怕嬰鱗害願言慎所託未用期一快

三月晦到大庾

張九成

我登超然臺積雨久不止臺下柳成行柳下滿塘水環塘率喬木  
照影弄清泚恍如在故鄉西湖古寺裏氣象極幽深景物盡蒼翠  
十年勞夢想一夕居眼底獨坐不能去頽然起深思鐘鳴主人歸  
燭光何燁燁笑語復移時夜久余當起歸路夫何如江聲寒玉碎

和施彥執懷姚進道葉先覺韻

張九成

西湖十里山春風一杯酒茲興良不淺何日落吾手我讀君和詩  
襟期一何厚同生上下宇共閱古今宙死生何足云餘年付美耐



佩印還故鄉衣錦眩春晝一時正兒嬉干歲墮塵垢所以賢達人  
中懷元有守試看牕日中野馬互奔驟區區竟何成尙誇舌在口  
宿習猶未除新詩漫懷舊環顧天地閒四海惟三友兩老雖未死  
二妙已先陪生者豈其巧死者亦非謬君如悟斯契萬事可懷袖  
銅錢自如山金印自如斗只今定河閒腐骨久已朽籬菊師淵明  
庭草悲王冑彼已升層霄此猶鑿戶牖浩歌君其聆相看都皓首

秋興

張九成

秋意入茆屋杖策登平原落日含西山一川頓明鮮蕭蕭江上竹  
溜溜巖下泉我生本閒放胡爲此拘拳身世兩相違於今六十年  
勇退未爲怯銳進豈其賢  
半夜驚夢回桐葉紛索索杖藜視天宇雨罷雲收腳清風拂襟裾  
片月墮籬落嗟我遊已倦悵此久淹泊豆畦今已花稻隴行可穫  
翻思黃卷中古人誰可作田園愛潛歸簞瓢識顏樂譬彼鷓鴣心  
平生任叢薄

修修牕前蘆

鄭剛中

修修牕前蘆孤瘦倚青玉心虛却夜涼風葉亂相觸使我入幽夢  
如在江湖宿方茲因炎曦愛爾眼中綠奈何柔脆姿行犯秋霜肅  
霏霏霜露中菱荷等摧覆大抵無勁節不及歲寒竹

暮春

汪應辰

閉門聽風雨不知門外春茲辰聊散步霽色如相親日月不吾與  
花柳隨時新悠悠竟何事悚然懷故人

延平江上呈吳國華先生

陳淵

青山如偉人可望不可制屹然瞰碧流龍翔虎豹視春風何時來  
草木舞深翠禽鳥暖相依飛鳴得真意誰言靜無作坐致無邊利  
顧言斬茅茨結室傍蒼蔚且要觀此身功業亦細事

次韻范濟美秋雨感懷

陳淵

一別劔溪水三換京塵秋夜聽空階雨歲月驚如流豈不念故國  
水清山亦幽螻蟻有微情未忍追浮邱平生老蒼友夫子賢其尤



窮經三十年一字不見收賴有管城公落紙無全牛他時恐不免  
速達吾所羞

小軒觀月呈興宗叔

陳淵

茆簷手可攀修竹出檐上寒蟾漏疏明碎影羅屏障情知月色好  
達覽在虛曠東家富池臺端坐不能訪山林足寓目細大初無相  
但使人心安景物自清暢霜風終夜作曲沼金翻浪禽鳥斷飛鳴  
杉松起酬唱燎爐宿殘火尚可温新釀數杯遣沈冥萬慮一時放  
誰能外形骸於世無所仰晤語一亭閒頽然齊得喪

從何使君父子遊墨池分韻得名字

成都縣治有墨池楊雄

草太元經處

李燾

蜀學擅天下馬王先得名簧如巧言語于道蓋小成子雲最後出  
振策思遐征斯文大一統欵使聖域清富貴盡在我絃冕非所榮  
旁皇天祿閣聊亦觀我生懷哉不能歸舊宅荒荆榛寂寞竟誰顧  
正路令莫行使君蓬萊仙弭節歸赤城門無俗賓客家有賢父兄

慨念此耆老不登漢公卿臨池一尊酒尚友千載英拜呼嚴與李  
月且其細評區區可無憾彼重適我輕竭來成都市塵土汗冠纓  
古人不可見見此眼自明請為懷古詩玉振而金聲

成都文類

江月圖

林之奇

冥冥一月輪不知水與天獨於顯氣中仰見素璧圓超然狂道士  
起視清夜闌自拈白玉笛吹此江月寒想當萬籟息逸響流空烟  
我從江海來形留意先還何當買魚篷追此水墨仙

登金山

唐文若

江流出岷蜀萬折東南傾茲山若巨舫勢欲扼滄溟天高象教尊  
海岳朝百靈雲水渺四極上下涵日星朱叢倚霄漢倒影魚龍驚  
重遊十年舊挂席鷗鳥迎維揚魏公幕回首劔戟明行都望北固  
鐵甕高崢嶸孤舟繫烟月六尺僧牕橫印師支遠傳靜對如風鈴  
曠懷憐此翁得法世慮平塵勞霜鬢禿風月冰壺清乞詩寫崖壁  
指月雙浮萍

金山志略



歸雲洞

周紫芝

南華老明師遺像頗清古昔為挂空月今作歸雲土雲來初無心雲去定何處空餘暗竇泉翠蓋含白乳華堂誰復支缺罃久未補林聲自成風山澗疑欲雨窮幽眼未饜曳杖足已苦入山無與迎出山信誰阻有客自去來山僧無一語

述陂

李浩

數椽臨蒼波我目得以寓長溪山根來澄潭一回互萬象森可掬修修澹清素草短牛羊飢沙煖鳧鷖聚枯槎自斷岸孤艇橫野渡荒寒何代城隱翳尚門戶昔時歌舞地今日採樵路回薄萬古心斜陽在烟樹撫州府志

檢校園花

洪适

往夏新閣成拔去園中葵萬花閒千蕊十夫勞徒移羣香頗旖旎密影初參差烈日吁可畏時雨不能滋未秋葉先隕欲冬枯亦萎虛蒙灌溉恩無復嫣然姿啁雀飛且止不肯登空枝寒蠶守枯葉

未忍相去離永懷斬新日豈料憔悴期誰呼殷七七來伴紅裳兒

金鼎一劑藥返魂庸可追春來作高亭綠沼揚清漪舊蹊類陳迹

遠圃分芳蕤結根旬浹閒生意渾熙熙微白李賦質小紅桃入肌

柳條并顏色已含烟雨眉遊蜂相召引有底渠先知地力固自若

大鈞不偏私此秀匪機巧向衰非銳遲萬物理固然颺芳須得時

上清宮

洪邁

振策衝暮雲攜琴宿仙境松風生夜涼蘿月散秋影洞遠落猿聲溪清鳴鶴頂中宵夢仙翁乘車停翠嶺獅子身五色鸞鳳互相引上有木幡幢金碧不可省風吹雲璈偏顧我忽而哂遺以丹篆文再拜豁心領明當謝浮榮飄然徒結軫

瑞香

陳克

佳人在空谷雙星思銀河契闊不自命盛時豈蹉跎娟娟匡廬秀如此粲者何幽牕下團圞微風自婆娑寂寥千載初戢戢蓬艾多何階計方便千金聘綺羅赤闌青篋舫丁寧護根窠泥沙亦天幸



南宋文範卷五  
三  
扳聯入宣和誰令蘭蕙徒憔悴守巖阿

南宋文範卷五

南宋文範卷六目錄

五言古詩

答王無功在京思故園見鄉人問

朱熹

卜居

朱熹

拜張魏公墓下

朱熹

奉同尤延之提舉廬山雜詠十四篇

朱熹

白鹿洞書院

折桂院黃雲觀

楞伽院李氏山房

棲賢院三峽橋

西澗清淨退菴

臥龍庵武侯祠

萬杉寺

開先漱玉亭



簡寂觀

歸宗寺

陶公醉石歸去來館

温湯

康王谷水簾

落星寺

石馬斜川之集分韻賦詩得燈字

擬古八首

還家即事

遊張公洞

庚子歲除前一日遊茅山

次韻趙公直賞心亭釀飲古風

己丑二月七日雨中讀漢元帝紀效樂天體

寄題高仲一夔殿撰識山堂長韻

朱熹

朱熹

朱熹

尤袤

尤袤

周必大

周必大

周必大

九月三日宿胥口始聞雁

賀樂丈先生南郊新居

盤龍驛

新嶺

麻線堆

嘲峽石

三月十六日石湖書事三首

戊子正月六日雷雨感歎示壽仁子

蕙花初開五言

明發陳公徑過摩舍那灘石峯下

秋雨蚤作有歎

碧落堂晚望荷山

和陸務觀見和歸館之韻

汪叔耕見訪不數日別去惡語為贈兼簡子用子美二友

范成大

范成大

范成大

范成大

范成大

范成大

范成大

楊萬里

楊萬里

楊萬里

楊萬里

楊萬里

楊萬里



春陰

吳傲

石門漁舍

薛季宣

戊辰三月清明後三日見葉丈于石林承命賦

詩作古風一

首

寒巖分韻得水字

韓元吉

送楊安止罷信幕赴調

韓元吉

寄酬曾學士學宛陵先生體比得書云所寓廣

教僧舍有陸

子泉每對之輒奉懷

陸游

秋郊有懷

陸游

秋夜感舊十二韻

陸游

送子龍赴吉州掾

陸游

雜興十首以貧堅志士節病長高人情為韻

陸游

示子通

陸游

石堰村

陸游

送曾學士赴行在

陸游

上書乞祠輒述鄙懷

陸游

歲暮感懷十首以餘年諒無幾休日愴已迫為韻

陸游

書感

陸游

劇暑

陸游

書逆旅壁

陸游

送汪尚書大猷歸鄞

趙汝愚

送胡子遠著作知漢州分韻得行字

呂祖謙

七月旦日晚登湘南樓

張栻

靜江歸舟中讀書

張栻

送別姚國博知處州分韻得綠字

林光朝

代陳季若上倉使

林光朝



彭子復臨海縣齋

樓鑰

題范寬秋山小景

樓鑰

送劉德修少卿潼川漕

樓鑰

送王木叔推官分韻得錦字

樓鑰

被旨許浦閱舟歸

袁說友

贈王副判

袁說友

梁寺丞見示過嶺新作

羅願

生朝無以自慰作留貧薦一杯

王炎

南宋文範卷六

長洲顧少卿先生鑒定

秀水莊仲方編

五言古詩

答王無功在京思故園見鄉人問

朱子

我從同川來見子上京客問我故鄉事慰子羈旅色子問我所知

我對子應識朋遊總強健童稚各長成華宗盛文史連牆富池亭

獨子園最古舊林間新垌柳行隨堤勢茅齋看地形竹從去年移

梅是今年榮渠水經夏響石苔終歲青院果早晚熟林花先後明

語罷相歎息浩然起深情歸哉且五斗餉子東皋耕

卜居

朱子

卜居屏山下俯仰三十秋終然村墟迴未愜心期幽近聞西山西

深谷開平疇茆茨十數家清川可行舟風俗頗淳樸曠土非難求

誓捐三徑資往遂一壑謀伐木南山巔結廬北山頭耕田東溪岸

濯足西水流朋來即共懽客去成孤遊靜有山水樂而無身世憂



著書俟來哲補過希前修茲焉畢暮景何必營菟裘

拜張魏公墓下

朱子

衡山何巍巍湘流亦湯湯我公獨何往劔履在此堂念昔中興初  
草豎倒冠裳公事首建議自此扶三綱精忠貫宸極孤憤摩穹蒼  
元戎二十萬一旦先啟行西征莫梁益南轅無江湘士心既豫附  
國威亦張皇縞素哭新宮哀聲連萬方黠虜聞禡魄經營久旁皇  
玉帛驟往來士馬且伏藏公謀適不用拱手遷南荒白首復來歸  
髮短丹心長拳拳冀感格汲汲勤修攘天命竟難諶人事亦靡常  
悠然謝台鼎騎龍白雲鄉坐令此空山名與日月彰千秋定軍壘  
岌嶭遙相望賤子來歲陰烈風振高岡下馬九頓首撫膺淚淋浪  
山頽今幾年志士日慘傷中原尙夷狄人類幾豺狼公還浩無期  
嗣德煒有光恭惟宋社稷永永垂無疆

奉同尤延之提舉廬山雜詠十四篇

朱子

白鹿洞書院

在郡城東北十五里事見記文

昔人讀書地町疇白鹿場世道有升降茲焉更表章矧今中興年  
治具一以張絃歌獨不嗣山水無輝光荒榛適翦除聖謨已汪洋  
亦有皇華使肯來登此堂問俗良懇惻懷賢增慨慷雅歌有餘韻  
絕學何能忘

折桂院黃雲觀

在書院東北五里院後作亭取李白黃雲萬里動風色之句

城中東北望五老何蒼蒼下有前朝寺一原頗深藏門前林澗幽

屋後雲木荒閑牕亦明潔著此瑞錦張僧房有瑞香花更能理枯筇步上

林北岡仰視天宇闊俯瞰江流長受書彼何人姓氏不足詳竹帛

有遺臭桂樹徒芬芳

李逢吉嘗讀書此院

楞伽院李氏山房

在折桂西十里李公擇讀書處有東坡記文詩刻枯樹墨跋

躡石循急澗穿林度重岡俛入幽谷邃仰見奇峯蒼李公英妙年

讀書此雲房一去上臺閣致身何慨慷蘇公記藏書文字有耿光

餘事亦騷雅戲墨仍風霜兩公不歸來歲月忽已荒何用建遺烈

寒泉薦孤芳



樓賢院三峽橋在楊伽西五里

兩岸蒼壁對直下成斗絕一水從中來湧滴知幾折石梁據其會  
迎望遠明滅倏至走長蛟捷來翻素雪聲雄萬霹靂勢倒千帶嶮  
足掉不自持魂驚詎堪說老仙有妙句千古擅奇崛尙想化鶴來  
乘流弄明月

西澗清淨退庵在樓賢西三里劉疑之舊隱

凌競渡三峽窈窕復一原絕壁擁蒼翠奔流近潺湲聞昔避世人  
寄此茅三間壯節未云遠高風杳難攀深尋得遺墟縛屋臨清灣  
坐晚寒木杪飛泉闕雲關茲遊非昔遊累解身復閑保此清淨退  
當歌不能謨

卧龍庵武侯祠在西澗西三里

空山卧龍處蒼峭神所鑿下有寒潭幽上有明河落我來愛佳名  
小築寄幽壑永念千載人丹心豈今昨英姿儼繪事凜若九原作  
寒藻薦芳馨飛泉奉明酌公來識此意顧步慘不樂抱膝一長吟

神交付冥漠

萬杉寺在卧龍西十里

休沐聊命駕駕言何所之行尋慶雲寺想象昭陵時門前杉徑深  
屋後杉色奇空山歲月晚鬱鬱凌寒姿當年雨露恩千載有餘滋  
匠石不敢睨孤標儼相持寺前後杉萬本皆天聖更啟石室藏仰  
中植有旨禁翦伐者瞻天像垂願以清淨化永為太平基寺藏仁祖御飛白書有清淨  
寺字

開先漱玉亭在萬杉西二里亭舊在橋上今廢

奇哉康山陽雙劍屹對起上有橫飛雲下有瀑布水崩騰復璀璨  
佳麗更雄偉勢從三梁外影落明湖裏平生兩仙句詠歎深仰止  
三年落星灣悵望眼空眯今朝隨杖屨得此弄清泚更誦玉虹篇  
塵襟諒昭洗

簡寂觀在開先西五里陸修靜所居

高士昔遺世築室蒼崖陰朝真石壇峻煉藥古井深結交五柳翁  
屢賞無絃琴相攜白蓮渚一笑傾夙心晚歲更市朝故山鎖雲岑



柴車竟不返鸞鶴空遺音修靜晚為宋明帝召至建康卒于崇虛館我來千載餘舊事

不可尋四顧但絕壁苦竹寒櫛相傳竹是修靜所植其萌即謂甜苦笋者

金輪紫霄上寶界鸞溪邊往昔王內史願香有餘煙相傳寺是王右軍故宅

千年今一歸景物還依然澗水既蕩涵山花亦清妍不辭原隰勞

樂此賓從賢訪古共紆鬱勞農獨勤攀憐我乖勝踐裂牋寄真詮

逃禪公勿遽且畢區中緣是日熹以事不得陪

陶公醉石歸去來館在歸宗西五里

予生千載後尙友千載前每尋高士傳獨羨淵明賢及此逢醉石

謂言公所眠况復巖壑古縹緲藏風煙仰看喬木陰俯聽橫飛泉

景物自清絕優游可忘年結廬倚蒼峭舉觴酬潺湲臨風一長嘯

亂以歸來篇

温湯在醉石南二里

連山西南來中斷還崛起千霄幾千仞據地三百里飛峯上靈秀

眾壑下清美逮茲勢力窮猶能出奇偉誰燃丹黃欲爨此玉池水

客來爭解帶先劫付一洗當年謝康樂絃絕今已矣水碧復流温

相思五湖裏康樂湖中詩云水碧較流温豈未見此水也耶

康王谷水簾谷口景德觀在温湯西十五里入谷又十五里至簾下

循山西北驚崎嶇幾經邱前行荒蹊斷豁見清溪流一涉臺殿古

再涉川原幽縈紆復屢渡乃得寒巖岫飛泉天上來一落散不收

披崖日璀璨噴壑風颼颼追薪爨絕品淪茗澆窮愁敬酬古陸子

何年復來遊陸鴻漸茶經第此水為天下第一在郡城南湖中

落落長江水東逝無停波及此一薄湖平煙浪多孤嶼屹中川

層臺起周阿晨望愛明滅夕遊驚蕩磨極目青冥茫回瞻碧嵯峨

不復車馬迹惟聞榜人歌我願辭世紛茲焉老漁蓑會有滄浪子

鳴舷夜相過

石馬斜川之集分韻賦詩得燈字

朱子



改歲風日好出門欣得朋復招里中彥及此雲間僧行行涉清波  
斯亭一來登徒倚綠樹蔭摩挲蒼石稜遙瞻原野春仰視天宇澄  
一水旣紆鬱羣山正峻嶒時禽悅新陽潛魚躍輕冰卻念去日年  
俯仰愁予膺長吟斜川詩日落寒煙凝暝色變晴景清尊照華燈  
頽顏感川祖稚齒歎年增酒盡不能起朱欄各深凭

擬古八首

朱子

離離原上樹戢戢澗中蒲娟娟東家子鬱鬱方幽居濯濯明月姿  
靡靡朝華敷昔爲春蘭芳今爲秋薜蘿寸心旣銷歇託體思同車  
綺閣百餘尺朝霞冠其端飛蘭麗遠漢曲楹何盤桓清謠登微音  
一唱再三歎借問誰爲此佳人本邯鄲微響激流風浮雲慘將寒  
爲言何所悲遊子在河間不恨久離澗但憂芳歲闌願爲清宵夢  
燕昵窮飲歡  
上山采薇蕨側徑多幽蘭采之不盈握欲寄道里艱洗憂念故人  
長夜何漫漫芳馨坐銷歇徘徊以悲歎

佳月朗秋夜蟋蟀鳴空堂大火西北流河漢未渠央野草不復滋  
白露結爲霜梁燕起高飛雲雁一南翔念我同心子音形阻一方  
不念執手歡隔我如參商寓龍不爲澤畫餅難充腸金石誠自堅  
虛名真可傷

鬱鬱澗底樹揚英秋草前與君結歡愛自比金石堅金石終不渝  
歡愛終不疏一夕遠離別悠然在中途相思未云變音容定何如  
傷彼三春葉灼灼層華敷盛時不可留怨逐嚴霜枯夫君來何晚  
賤妾長離居

高樓一何高俯瞰窮山河秋風一夕至憔悴已復多寒暑遞推遷  
歲月如頽波離騷感遲暮惜憫蹉跎放意極驩虞咄此可奈何  
邯鄲多名姬素艷凌朝華妖歌掩齊右緩舞傾陽阿徘徊起梁塵  
綵縹紛衣羅麗服秉奇芬顧我長咨嗟願生喬木陰黃綠若絲蘿  
夫君滄海至贈我一篋珠誰言君行近南北萬里餘結作同心花  
綴在紅羅襦雙垂合歡帶麗服眷微軀爲君一起舞君情定何如



眾星何歷歷嚴宵麗中天殷憂在之子起步荒庭前出門今幾時  
書劄何由宣沈吟不能釋愁結當誰憐臨風一長歎淚落如奔泉

還家即事

朱子

獻歲事行役徂春始還歸昔往草木芳今來翠成幃扶疏滿園陰  
時禽互翻飛叢萱亦已秀丹葩耀晨輝即事誰與娛淹留月忘機  
日暮復出門悵然心事違古人不可見獨掩荒園扉

遊張公洞

尤表

舟次湖汊侍季父伯兄遊洞靈步行五里夾道皆喬木參  
天鶴巢其上若笑若咳澗水瀲灩鳴聲甚悲殆不類人間  
也入洞靈宮覽前賢留題徘徊久之由石徑里許達於洞  
洞深數十丈磴道險絕俯僂僅可下下寬廣容數百人大  
石離立或下聳欲落若劍盾矛戟相撐拄或莖連嘔起而  
不斷若虎豹蹲伏俯踞而擎攫中有小門持炬乃得入丹  
竈井田在焉由石罅而上皆流石怪形無窮其狀旁行屈

曲蓋深遠不可到其陽有懸崖滴乳水水流澗谷乍細乍  
大自成宮商橫澗得小閣可憩朱藤纏絡崖上丹花簸簸  
下墜芬芳襲人毛髮凜然欲少留而大風作遂歸余遊山  
川多矣茲遊最可紀因成五百字貽我同志以備他日觀  
覽焉

吾聞荆漢南有地仙所宅十年勞夢想今日著腳歷扁舟下湖汊  
水漲沒砂磧結纜小橋旁杖藜從此適下岡面陂陀疊嶂堆巒積  
行行三兩里夾道喬木植其木幾合抱其高乃千尺風生萬壑響  
日照四山赤時搖樹林杪忽見屋宇脊宮門何崢嶸古道頗修直  
長廊景曠曠崩殿人寂寂寥落昔賢題摩挲壁間墨捫蘿上層巔  
俯瞰得深窟危梯交枝撐鳥道穿詰屈投身乍寬閑跼步仍逼窄  
攀援愁顛躋傲睨驚險僻懸崖朶頰亂石供劍戟白雲何時橫  
乳溢或自滴中空正瀕洞了不見天隙冥行迷近遠偃僂猶擿埴  
巉巖豈人工隱軫入地脉窮幽或篝火俯跪僅容席仙壇尙故處



丹竈儼遺跡山蟲鳴啾嘍野鼠聲噴嗜傳聞父老語以往真莫測  
中有白玉堂橫絕巨石塞傍連洞庭野欲去不可極潛窺目先旋  
縱走膝無力躑迴步西徑突兀出峭壁樅風高枝樛藤蔓青陰羃  
芳草何芊綿丹花亦狼藉躊躇古亭上頽仰幽澗碧玳瑁下流水  
磊塊欲落石雖云培塿高氣與嵩華敵其南有空穴澹瀕殷幽黑  
陰風互吞吐冷氣森噴逼蛟龍久伏藏金玉閤簡冊靈蹤信茫昧  
幻怪紛慘戚將無神物守欲與世壤隔平生邱壑念蚤歲泉石癖  
豈不思三山所恨無六翮樂哉茲辰遊逸興潛有激仙翁在何許  
綠髮尙如昔髣髴笙簫聲徘徊鸞鶴翼俗緣磨不盡夢境坐形役  
何階築衡茅幽時窮日夕風雲西北起天地忽改色倉皇促歸舟  
造物豈戲劇良遊易乖忤真賞難再得寄語山中人重來儻相識  
庚子歲除前一日遊茅山  
尤表

犯寒出行邁值此歲云除剛風駕颺輪送我遊清都華陽第八天  
仙聖之所居洞門劣容人中寬如室廬橫前大溪水於焉限塵區

其右萬石林錯落空翠圖茅庵著深秀細路緣崎嶇幽泉見客喜  
頗亦類逃虛山深日易曛捷徑趨元符琳宮照金碧天籟鳴笙竽  
側睨白雲峯前瞻赤沙湖金壇聳百丈陰洞通七塗俯視人間世  
擾擾真蟲蛆早以冗陋質忝分赤城符豈悟夙昔緣復造神霄墟  
平生夢寐處恍若登華胥歸來拜綠章足力尙有餘珍館十六所  
安能遍遨娛窮探恨不盡太息仍躊躇  
次韻趙公直賞心亭釀飲古風  
周必大

晉人誇新亭假日輒高會中間伯仁輩未免楚囚對江山猶古昔  
快物已曖昧東郊今保釐翠華記行在佳麗壓淮楚追遊勝冠蓋  
茲樓貫城雉于邁無小大令威雖不歸靈光故無碍黑雲互明滅  
川郭相映帶當年烏衣遊此日思一概從容值休沐登臨多慷慨  
幽懷忽軒豁細故絕芥蒂已尋詩社盟更許食期戒佳賓滿坐上  
好風來天外舟移白鷺洲遠目送飛鳥快方種淵明秫粗免監河  
貨一醉儻可期與君時倒載



已丑二月七日雨中讀漢元帝紀效樂天體 周必大  
昭君顏如花萬里度雞鹿古今罪畫手妍醜亂羣目誰知漢天子  
祛服自列屋有如公主親尚許穹廬辱況乃嬪嬙微未得當獯鬻  
奈何弄文士太息爭度曲生傳琵琶聲死對青塚哭向令老後宮  
安得載簡牘一時抱微恨千古留賸馥因嗟當時事賢佞手反覆  
守道蕭傅死效忠京房戮史臣一張紙此外誰復錄有琴何人操  
有塚何人宿重色不重德聊以砭世俗

寄題高仲一夔殿撰識山堂長韻

周必大

買山老山間乃識山之容愛山無古今此論誰非同仇仙來唐盧  
一轉語不工不識山面目只緣在山中譬之塵漠漠又如水溶溶  
人魚居其間孰識得與通我惜少年日自攜七尺筇盤旋山南北  
憩息林西東朝看山之橫暮看山之縱貪多眼爲乏陟險足已慵  
拱揖且不暇賞失良自蒙方悟白司馬草堂對穹窿彼旣若獻狀  
此亦如發矇秀甲天下山至言出心胸今君欲繼之築堂會奇峯  
何嘗遠城市而能目迎逢山形不動體山色含真空風雲有蓄洩  
氣象無終窮雨餘四面翠日麗千仞紅氤氳香爐煙挺拔雙劍峯  
最愛五老山峻嶒美所鍾可望不可卽有意容相從羅列皆兒孫  
几席次第供山雖誇兩邦茲焉實長雄不爲空堂客詎信山有宗  
寄語遊山者毋徒走憧憧

九月三日宿胥口始聞雁

范成大

故人久不見乍見雜悲喜新雁如故人一聲驚我起把酒不能觴  
送目問行李曾云行路難空濛千萬里塞北多關山江南渺雲水  
風高吹汝瘦旅伴今餘幾斜行不少駐滅沒蒼煙裏羈遊吾亦倦  
客程殊未已扁舟費年華短纜繫沙尾物性各有役冥心聽行止  
江郊匝地熟場圃平如砥歸期且勿念共飽豐年米

賀樂丈先生南郊新居

范成大

新堂燕雀喜竹籬挂藤蘿崩奔風濤裏得此巢龜荷西山效爽氣  
南浦供清波會心不在遠容膝何須多先生淮海俊踏地嘗兵戈



飄飄萬里道芒鞋厭關河風吹落下邑楚語成吳歌豈不有故國  
荒垣菊秋莎無庸說當歸到處皆南柯卜遷不我遐一水明青羅  
門戶長獨佳奈客剝啄何會令蒼苔石屐齒如蜂巢

盤龍驛

范成大

聞雞一唱罷占星三斗沒天高月徘徊野曠山突兀暗蛩泣草露  
怨亂語還咽涼螢不復舉點綴稻花末惟餘絡緯豪悲壯殷林樾  
小蟲亦何情孤客心斷絕魂驚板橋穿足側石子滑行路如許難  
誰能不華髮高城謾回首疊嶂屹天闕遙知秋衾夢千里一飄忽

新嶺

范成大

瘦馬兀曹騰荒雞號蒼莽絲窠冒朝露籬落萬蛛網宿雲拂樹過  
飛泉擘山響老桑踟潛蚪怪蔓挂騰蟒山行何許深空翠滴羈鞅  
釀愁積雨寒破悶朝日放瞳瞳赤幟張昱昱金鉦上浮動草花馥  
清和野琴唱僕夫有好語沙平露如掌惟憂三溪阻橋斷山水漲

麻線堆

范成大

峽口驛前大山崛起舊路攀援而上縈紆如線十五年前  
浮圖德寶始沿澗伐木作新路不復登山余觀峽路皆未  
嘗經修感德寶之事作麻線堆詩一首以風夔路使者及

歸峽二州長吏沈葉管熊四君

雲木盪胸起鬱我一峰危上有路千折縷如縈絲是為麻線堆  
厥險天下稀偏仄容半足顛墜寧復稽騰猱尚愁苦遊子將安之  
浮屠德寶者悲智緒等慈隨山刊古木尋壑得長磯輿梁絕飛渡  
布石綿階梯自從新路改重趼無齋咨縣有孫少府琬琰刻文詞  
勿云此事小惟有行人知况觀峽山路由來欠平治官吏既弗跡  
誰肯深長思天險固自若當令路成蹊土工運畚鍤石工操鑿椎  
烈火敗礪确築沙填隙巖多用百夫力遠無五旬期但冀米鹽給  
不煩金幣支非客敢竊議道旁詢旄倪身雖雪山成亦願助毫釐  
工費嗟小哉政須賢有司東有管夷陵西有葉秭歸上維沈隱侯  
夔臺今吏師下維熊繹孫長材佐州麾豈吾金閨彥不如林下緇



懸知議克合了此一段奇舟楫避潢潦還郵疾馳憧憧吳蜀客  
來往當無時仍磨鑽天石大書四賢詩不佞願秉筆遠繼峽口碑

嘲峽石

范成大

峽山江濱亂石萬狀極有醜怪不可形容舉非世間諸所  
有石之比走筆戲題且以紀異

峽山狠無情其下多醜石頑質賈憎垂俛狀發笑啞粗類墳壤黃  
沈漬鐵矢黑或如溝泥碗或似東壁坼堆疑聚廩粟侈若壞成甃  
槎牙鏤朽木狼籍委枯骸礪礪包羸蚌淋漓錫鉛錫縱紋瓦溝隴  
橫疊衣摺襞鱗皴斧鑿餘坎窞蹴踏力云何清淑氣孕此譎詭跡  
我本一邱壑嗜石舊成癖端溪紫琳映洮河綠沈色階冊截肪膩  
泗磬鳴球擊嵌空太湖底偶立韶江側真陽劉千巖營道創寸碧  
倦遊所閱多未易一二籍榻來茲山下刺眼昔未覲或云峽多材  
秀奇鬱以積絕代昭君村驚世屈原宅東家兩兒女氣足豪萬國  
山石何重輕奚暇更融液我亦味其言作詩曉行客

三月十六日石湖書事三首

范成大

春事日以闌暑陰正清美拖筇入林下秀綠照衣袂盧橘梅子黃  
櫻桃桑葚紫荷依浪花顛筍破苔色起風日收宿陰物色有新意  
鄰曲知我歸爭來問何似病腦今有無加飯日能幾掀髯謝父老  
衰雪已如此

種木二十年手開南野荒苒苒新歲月依依舊林塘汗萊擅下濕  
芩蔚驕眾芳菱母尙能瘦竹孫如許長憶初學圃時刀笠冒風霜  
今茲百不堪裏帽人扶將龍鍾數能來猶勝兩相忘  
湖光明可鑒山色淨如沐閒心愜舊觀愁眼快奇矚依然北牕下  
凝塵滿香簾訪我烏皮几拂我青氍褥荒哉賦遠遊幸甚遂初服  
老紅餞餘春眾綠自幽馥好風吹晚晴斜照入疏竹兀坐胎息勻  
不覺清夢熟

戊子正月六日雷雨感歎示壽仁子

楊萬里

今晨忽雷雨天地又發春草木闕紅綠生意密已欣蟄蟲且徐動



餘寒未全仁先生起裹頭三歎一再颺春風吹萬物不吹先生貧  
靖怨一束書只博兩袴塵自倚文字工意取造物真小兒在旁笑  
笑我浪苦辛去年作客子椒柏羨主人在家不差勝更用愁此身  
先生亦一莞我不如兒真為我滿眼酷不問醜與醇杖頭日百錢  
無借諸鄰不然衣可典及此花柳新

蕙花初開五言

楊萬里

幽人非愛山出山將何之山居種蘭蕙歲寒久當知初蕝止百畝  
餘地惜奚為先生無廣居干巖一茅茨四面祇蕝蕝中間纔置錐  
銳綠分宿叢修紫擢幼枝孤幹八九花一花破初蕝西風淡無味  
微度成香吹燈夢得幽馥月寫傳靜姿我欲掇芳英和露充晨炊  
春然惻不忍環玩息忘飢豈無眾花草不願秋不遲種時亂不擇  
歲晚悔可追

明發陳公徑過摩舍那灘石峰下

楊萬里

遙松煙未消近竹露猶滴石峰矜孤銳喜以江自隔清潭涵曦紫

碧岫過雲白回瞻宿處堤路轉不可覓地迴人絕影山僻虎留跡  
下有無底潭上有欲落石是間一徑橫夾以萬松直樹從何時有  
陳公所手植陳公今焉在徑松自寒碧

昨宵望石峰相去無一尺今日行終朝祇繞石峰側石峰何曾遠  
江路自不直仰瞻碧屏巖清峽如立壁反側得細看何必更登陟  
後顧江已遠前顧江若塞掉進岸自回天水未有極簾欣入絕巘  
舟愕觸潛石東瞰淡未熹北吹寒更寂岸草不知愁向人弄晴碧  
澄潭湧晴暈不風自成花回流如倦客出門復還家江晴已數日  
新漲沒舊沙知是前溪雨濕雲尙橫斜

山轉江亦轉江行山亦行風鬟照玉鏡素練縈青屏我本山水客  
澹無軒冕情塵中悔一來事外懷孤征忽乘滄浪舟仰高俯深情  
餐翠腹可飽飲淥身須輕鷓鴣不相識還作故園聲

危峰瑩無土平地岌孤石如何半巖間亦有小樹碧走空根苦辛  
倚險榦寒瘖芳蘭間叢生紫蕤濯幽色近香許世聞遠秀絕人摘



而我雲外身方茲唱行役

城中安得山無山安得詩我入五羊城遠與山水辭有鏡不敢覽  
塵面我自知解組來歸亭山水奔相隨水光動我巾山色染我衣  
舟行將一月恨速不恨遲山雲來未已江月皎無滓開懷放之入  
出語頗似之

我從靈州來惟見芳草渡蒹葭隨水遠曠野無立樹挂席上真陽  
好山忽無數好山如隱士避世不自露不應官道旁乃有見山處  
借識衛叔玠未覩樂彥輔石峰再難得舟過更回顧  
南中山絕佳所恨人煙稀略無好事人結茅臨深溪峰頂可月亭  
岸石即釣磯空令煙中猿挂崖弄漣漪山多人自少人遠山益奇  
我舟行不留過眼山如馳過眼意已足久留亦何為

秋雨蚤作有歎

楊萬里

細雨簷無質安得更更有聲如何卻作泥亦能妨晨征宿昔忽過暄  
心知非堅晴何須晴極然後寒雨生寒生使人覺妙物亦何曾

翦翦自神妙無乃與物矜造物本非作觀者或強名老夫近稍聾  
此事無暇聽平生感秋至此事今已平獨念老病身頗不耐夙興  
何時歸故園晏眠閉柴荆鳴雞亦不留好夢無吾驚他年憶此時  
惘然宿酒醒思歸已可喜而況真歸耕

碧落堂晚望荷山

楊萬里

荷山非不高城裏自不見一登碧落堂山色正對面如人卧平地  
躍起立天半指揮出伏兵萬騎橫隔岸後乘來未已前驅瞻已遠  
晨光到巖谿人物俱蒨絢綠屏分開閣翠旗閃舒卷安得垂天虹  
橋虛度雲巘老鈴偶報事郡庭集賓贊忽忽換山巾默默下林坂

和陸務觀見和歸館之韻

楊萬里

君詩如精金入手知價重鑄作鼎及鼐所向一一中我如駑並驥  
夷塗不應共難追紫蛇電徒掣青絲輕析膠偶投漆異榻可同夢  
不知清廟茅可望明堂棟平生憐坡老高眼薄蕭統渠若有猗那  
心肯師晉宋破琴聊再行新笛正三弄因君發狂言湖山春已動



汪叔耕見訪不數日別去惡語爲贈兼簡子用子美二友

吳儼

自覺得老窮掃軌事幽屏  
茫然羅雀門有客頽而整  
悲歡十年別樽酒清夜永  
妙句時驚人盈軸肯傾廩  
三日語未休霜寒夢歸省  
臨流分別袂波光照孤影  
重念吾故人雪屋清燈冷  
劉子抱遺經深井汲修綆  
曹子中庸學天理窮性命  
老驥鼓不足舉旗望公等  
天晴風日佳何時過颺徑  
石鼎然豆萁冰菹煮湯餅

春陰

薛季宣

春陰一何甚愁結牕外花  
細雨打疏竹涓涓草新芽  
眷此忽中慘吾生浩無涯  
閑讀几上書可歎復可嗟  
時流諒難追世路亦以賒  
折腰墨綬卑坐有憂患加  
官柳粲新綠黃鸝語淫哇  
把盞但心醉天外日已斜  
魄月沈半壁歸飛噪啼鴉  
仰頭望虛碧冥冥密雲遮  
風塵政昏暗逃形乏浮槎  
顧影還自笑狂遊蕩無家  
弩頭強應世鈍若倒拔蛇  
先人營舊廬清池旁兼葭  
芳時綉文錦翻濤散晴霞

霽色故自好風霾益云嘉  
何當舍此去忘情傲丹葩

石門漁舍

薛季宣

漁家在何許躡駁巖下石  
花樹幾枝芳湖山數峰碧  
窳樽亭遂古雙闕天自闢  
錦繡入芙蓉藤蘿封筆柵  
吾爲江上遊形苦世間役  
心馳定沙步舟行過簷隙  
浪翁底鐫銘太尉此居宅  
豈若斯人徒風雲相主客

戊辰三月清明後三日見葉丈于石林承命賦詩作古風一首  
葉名夢得 韓元吉

東風易陰晴一雨曉便止  
捨舟欣徐行烏鵲聲爲喜  
岩巖石林谷蒼翠間紅紫  
丈人厭調元玩意邱壑裏  
鄭公化鄉閭鄴侯盛圖史  
千載發詞源一點詣真理  
霞裾月中仙珠履天下士  
時從詩酒樂不負湖山美  
方瞳照玄髮眉壽端自此  
緬懷西湖春荆棘迷故里  
兩髦看公遊玉節旋屢弭  
風塵三十載碌碌類餘子  
晚登載欣堂警欬聞正始  
榆枋望天池奮迅思決起  
當謀白雲居敢援赤松比



臨流整遊觀三沐聊洗耳

寒巖分韻得水字

韓元吉

青山如幽人不肯住城市客從城市來一見消吝鄙平時與周旋  
況復非俗士我初見南山秀色紛可喜謂言官塵埃洗滌端在此  
經時未一至引望若千里昨朝得休暇佳興難自已秋原麗新晴  
景物為清美獨遊已不惡更約二三子初從澗壑危稍入巖石倚  
白雲隨杖藜蒼煙生屐齒主翁亦好事結茆修竹底庭空百無有  
屈曲但流水客來了不問花草自紅紫豈無一尊酒欲飲還遽止  
歸鞍不可速吾亦聊洗耳

送楊安止罷信幕赴調

韓元吉

後生仰前輩今世思古人豈重歲月久所懷風俗淳昔我家閩中  
龜山實其鄰出門尙羣盜欲往志不伸相從朋舊間得語盡可珍  
俯仰今幾何遺編半埃塵白頭入幕府始與夫子親夫子龜山裔  
麈尾見祥麟晚同柱後史無心問平津典刑在眉睫温然異羣倫  
向來簿領中挾書聽諄諄豈不開我塞異聞此其真亦或舉樽酒  
笑談忘賤貧同僚各分散世事日以新遙憐鄭公鄉俎豆猶莘莘  
彈冠定不苟家庭有書紳道學固未泯吾謀復誰陳尙想金馬門  
西湖醉餘春

寄酬曾學士學宛陵先生體比得書云所寓廣教僧舍有陸

子泉每對之輒奉懷

陸游

庭中下午鵲門外傳遠書小印紅屈蟠兩端黃蠟塗開緘展矮紙  
滑細疑卵膚首言勞良苦後問逮妻孥中間勉以仕語意極勤渠  
字如老瘠竹墨淡行疏疏詩如古鼎篆可愛不可摹快讀醒人意  
垢癢逢爬梳細讀味益長炙轂出膏腴行吟坐卧看廢食至日晡  
想見落筆時萬象聽指呼亦知題詩處綠井石髮麤公閒計有客  
煎茶置風爐倘公無客時濯纓亦足娛井名本季疵思人理豈無  
居然及賤子媿謝恩意殊幾時得從公舊學鋤荒蕪古文講聲形  
誤字辨魯魚時時酌井泉露芽奉瓢盂不知公許否因風報何如



秋郊有懷

陸游

楚人固多孱妄謂秋可悲寧知河嶽間氣俗樂此時壯士鳴雕弓  
健馬嚼枯萁日馳三百里榆關赴戰期陣雲壓龍庭殺氣搖參旗  
熾火燎狐兔倒瀉黃金厄勒銘燕然石千載鎮胡兒安能空山裏  
凍研哦清詩

秋山瘦益奇秋水淺可涉出城西風勁拂帽吹脫葉新霜折栗罅  
宿雨飽豆莢枯柳無鳴蜩寒花有穿蝶郊行得幽曠頗覺耳目愜  
斷雲北山來欣然與之接挂冠易事爾看鏡歎勛業永懷桑乾河  
夜渡擁馬鬣

秋夜感舊十二韻

陸游

冷螢綴蓬根忽復照高樹年光逝不留百感集遲暮往者秦蜀間  
慷慨事征戍猿啼鬼迷店馬噤飛石鋪危嶺高入雲朽棧劣容步  
天近星宿大江惡蛟鼉怒意氣頗自奇性命那復顧最懷清渭上  
衝雪夜掠度封侯細事爾所冀垂竹素兜鍪竟何成豈獨儒冠誤

當時妄校尉旗纛今照路浩歌遂成章聊慰老不遇

送子龍赴吉州掾

陸游

我老汝遠行知汝非得已駕言當送汝揮涕不能止人誰樂離別  
坐貧至于此汝行犯胥濤次第過彭蠡波橫吞舟魚林嘯獨脚鬼  
野飯何店炊孤櫂何岸檣判司比唐時猶幸免管箠庭參亦何辱  
負職乃可恥汝為吉州吏但飲吉州水一錢亦分明誰能肆讒毀  
聚俸嫁阿惜擇士教元禮我食可自營勿用念甘旨衣穿聽露肘  
履破從見趾出門雖被嘲歸舍卻睡美益公名位重凜若喬嶽峙  
汝以通家故或許望燕几得見已足榮切勿有所啟又若楊誠齋  
清介世莫比一聞俗人言三日歸洗耳汝但問起居餘事勿挂齒  
希周有世好敬叔乃鄉里豈惟能文辭寶亦堅操履相從勉講學  
事業在積累仁義本何常蹈之則君子汝去三年歸我儻未即死  
江中有鯉魚頻寄書一紙

雜興十首以貧堅志士節病長高人情為韻

陸游



仕宦徧四方每出歸愈貧寒暑更質衣笑倒鄰里人今年作史官  
坐縻太倉陳無如思歸何日夜望絕麟區區牛馬走齷齪蟻蝨臣  
恩深老不報肝膽空輪囷

孟子闢楊墨吾道方粲然韓愈排佛老不失聖所傳伐木當伐根  
攻敵當攻堅坐視日月食孰探天地全一木信難恃要憂大厦顛  
安得孟韓輩出爲吾黨先

聖人固多能藝乃不以試嗟予少貧賤日月成坐棄矧今耄已及  
甘食而美睡道衰朋友散斯文凜將墜閉戶輒竟日孰與講仁智  
厭厭生意盡何暇議勵志

少年喜結交患難謂可倚寧知事大謬親友化虎兇出仕五十年  
危不以讒死始畏囊中錐寧取道旁李老來多新知英彥終可喜  
豈以二三君遂疑天下士

昔我遊廬山夜雨東林雪灰深火正熟膏滅燈半滅童驚林虎過  
僧惜澗松折至今每追想可解肺肝熱那知蓬山夢忽繼此清絕

殊勝蘇子卿餐糗持漢節

觀人如觀玉拙眼喜譏評得失顧在人玉固非所病慶歷嘉祐間  
人才於斯盛王回僅一招石介棄不聘乃知天下士成敗各有命  
願君姑安之天定豈不勝

兩山如峩眉一水若車輞吾昔廬其間百里臨蒼莽少年手藝木  
條榦日夜長咿啞駕獨轅迢遞搖兩槩平生會心地今乃寄夢想  
何時喚鄰翁煙水行布網

貨財不可居祿位不可饗我爾本一家何至臯闌鑿小夫謀人國  
紛紛日煎熬或謂性本惡或謂經無裒誤人方自此孰如飲醇醪  
清言亦自佳遺事非徒高

魯山粹而博韶美曠且真石渠東觀中久矣無若人飛仙驂鳳鸞  
豈久混世塵空餘文章在常與日月新我雖不足數疇昔忝交親  
尙想秋燈下對影敲幅巾

君子尙大節又甚惡不情魯連故可人用意終近名千載高夷齊



采薇忘其生周公述易象所以貴幽貞去聖雖已遠江左見淵明  
我讀飲酒詩朱絃有遺聲

示子適

陸游

我初學詩日但欲工藻繪中年始少悟漸若窺宏大怪奇亦間出  
如石漱湍瀨數仞李杜牆常恨欠領會元白纔倚門温李真市儈  
正令筆扛鼎亦未造三昧詩為六藝一豈用資狡獪晉人謂戲為狡獪今閩語  
爾汝果欲學詩工夫在詩外

石堰村

陸游

木落山不蔽水縮洲自獻寒日晚更明村巷曲折見小婦鳴機杼  
童子陳筆硯農家雖苦貧終勝異鄉縣君看宦遊子豈無墳墓戀  
生死在故鄉切勿慕乘傳

送曾學士赴行在

陸游

二月侍燕觴紅杏寒未拆四月送入都杏子已可摘流年不貸人  
俯仰遂成昔事賢要及時感此我心惻欲書加餐字寄之西飛翮

念公為民起我得怨乖隔搖搖跂前旌去去望車軌亭鄣鬱將莫  
落日澹陂澤敢忘國士風涕泣效臧獲敬輸千一慮或取二三策  
公歸對延英清問方側席民瘼公所知願言寫肝膈向來酷吏橫  
至今有遺螫織羅士破膽白著民碎魄詔書已屢下宿蠹或未革  
期公作醫和湯劑窮絡脉士生恨不用得位忍辭責併乞謝諸賢  
努力光竹帛

上書乞祠輒述鄙懷

陸游

干祿本代耕窮達敢自必早遇高皇帝九品對宣室妄懷犬馬心  
嫠緯不暇恤上恩等天地腰領免斧鑕旋屬紹興末暘谷瞻出日  
賤臣復何幸便殿首造膝煌煌帝堯典推擇首秉筆愚忠雖懇欵  
野性實坦率飄然去周行湖海抱沈疾遠遊客窮塞亭障秋蕭瑟  
聖君終記省萬里忽乘驛同朝久凋謝存者不十一造廷故抱暗  
下殿衰涕溢蹉跎又十載憂患豈易述流年不貸人白髮日夜密  
冠雖未即挂馭已不容叱尚覲公朝恩養老霑散秩閉門教子孫



志願真永畢

歲暮感懷十首以餘年諒無幾休日愴已迫爲韻

陸游

昨莫送客歸短櫂過魯墟故廬有遺址青山遶牆隅桑竹雖鬱然  
舊植已無餘瓦礫不可求而況屋壁書繫舟問鄰人搔首久躊躇  
行當挂朝衣躬耕返吾初

我家釋耒起遠自東封前詩書守素業蟬聯二百年長老日零落  
念之心惕然每恐後生輩或爲利欲遷我少亦知學蹭蹬及華顛  
訟過豈不力壽非金石堅

我壯已早衰晨鏡每惆悵藥物姑自持耆老曷敢望造物有乘除  
貧悴博無恙歸鄉更多感朋舊盡凋喪客來多避席謂我丈人行  
此意詎敢忘報子以直諒

士生始志學固爲聖人徒人人可稷禹世世皆唐虞仰事與俯育  
治道無絕殊孔孟之所傳世俗固謂迂申韓尙刻薄老莊競虛無

爾車非不良盍行九軌途

江左謝太傅高卧頗自喜東山豈不佳惜也終一起阿堅偶自敗  
元子亦適死區區疑謗中勲業端有幾當時嘲小草雖戲實中理  
所以山中人至今笑園綺

家世本無年甲子近一周小子獨何幸七十今平頭往者收朝迹  
亟欲求歸休厚恩許奉祠得祿歲逾憂三釜不及親顧爲妻子留  
何由洗此媿欲挽天河流

高皇昔中興風雨躬沐櫛一士未嘗遺萬里皆馳日兼聽闕言路  
虛懷詢得失孤臣實草芥亦獲對宣室龍顏宛在目德不報萬一  
橋山松柏寒淚盡史臣筆

王師宿梁益行臺護諸將腐儒忝辟書萬里至渭上旌旗照關路  
風雪暗戎帳堂堂鐵馬陣疊疊木牛餉誰知骨相薄空負心膽壯  
回首二十年撫事增悲愴

在昔祖宗時風俗極粹美人材兼南北議論忘彼此誰令各植黨



更仆而迭起中更夷狄禍此風猶未已臣不難負君生者固賣死  
儻築太平基請自厚俗始  
井地以養民整整若碁畫初無甚貧富家有五畝宅哀哉古益遠  
禍始開阡陌豪富役千奴貧老無寸帛困窮禮義廢盜賊起蹙迫  
誰能講古制壽我太平脉

書感

陸游

頭顱已可知牙齒今復落十步或再休啜粥不及勺身依一蒲團  
壁挂兩芒屨對客輒坐睡有問莫能醉念昔少壯時心慕宦遊樂  
初登平津館晚入征西幕雨暗駱谷烽霜清散關柝登高望中原  
氣已吞雍雒寧知事大謬憔悴理征橐單車去梁益健席下沔鄂  
還朝見故人大馬黃金絡後來固多士鵷鷺照臺閣婆娑郎吏間  
祇自取嘲噓歷思從來事無鐵可打錯幸得還故園快若解束縛  
閭里通有無情厚不為薄泥行事春耕日曝畢秋穫隔牆喚鄰翁  
濁酒聊笑酌

劇暑

陸游

六月暑方劇喘汗不支持逃之顧無術惟望樹影移或謂當讀書  
或勸把酒厄或誇作字好蕭然卻炎曦或欲溪上釣或思竹間碁  
亦有出下策買簞傾家貲赤腳踏層冰此計又絕癡我獨謂不然  
願子少置思方今詔書下淮汴方出師黃旗立轅門羽檄晝夜馳  
大將先擐甲三軍隨指揮行伍未盡食大將不言飢渴不先飲水  
驟不先告疲吾儕獨安居茂林蔭茅茨脫巾濯寒泉卧起從其私  
于此尚畏熱鬼神其可欺坐客皆謂然索紙遂成詩便覺牕几間  
颯颯清風吹

書逆旅壁

陸游

百憂襲莫年懷抱日騷屑雖云歸故鄉何異萬里客窮冬迫寒餓  
凜有在陳厄駕言適近村慘慘天欲雪人沽村市酒馬齧山坡麥  
旅炊雜沙土得飽何暇擇手皸若龜兆面槁無人色士窮自其分  
所幸全大節功名已甌墮身世真瓦裂不學玉關人饑鷹方夜掣



送汪尚書大猷歸鄞

趙汝愚

尚書天官貴持經侍幃幄青冥欲無際白首非過約連檣動南浦  
父老望巖壑下車入里門執手問歡樂十年幾風雨寒雞叫屋角  
勤勞畢吾分帝賚出寵渥殊適奉香火禁直連六閣遂令宣室思  
從今問晦朔益波府志

送胡子遠著作知漢州分韻得行字

呂祖謙

定交不在蚤意合蓋已傾胡侯西南來兩載同書檠與人徐有味  
於世初無營虛舟澹容與未易寵辱驚魚龍一同波中有千丈清  
道氣自深穩名言常簡明南宮接東觀天衢勢方亨夢回得遠信  
窺簷渚鴻鳴開書見連環歸興浩已盈子政方校錄令伯俄陳情  
都門日轂擊雜襲炎涼并誰知此麾蓋獨為思親行夾道皆歎息  
始識真重輕古來聚散地雪野天崢嶸別袖不可挽宿昔洲渚生  
君臣有大義忠孝相持衡勉哉懋明德清廟須棟費

七月旦日晚登湘南樓

張栻

文書稍去眼日夕進微涼高樓一徙倚清風為我長漁父蔭深樾  
歸人度浮梁仰看河漢明俯視羣山蒼平生會心處於此故難忘  
舊聞水東勝巖巒發天藏豈無一日暇勇往聊徜徉民瘼未渠補  
況敢懷樂康天邊雲物佳似復為兩祥秋成倘可期歲晚或自強  
當從農家鼓一歷水雲鄉

靜江歸舟中讀書

張栻

南風駕小雨羣山淨如沐吾歸及新涼所歷慰心目軋軋柔櫓鳴  
臥見山起伏推枕意悠然還取我書讀平生領解處於焉更三復  
老矣百念疏但欲斯境熟向來五嶺遊日力半吏牘小心了官事  
終覺愧憚獨世路自險夷人情費追逐翩翩孤飛翼息蔭望林麓

送別姚國博知處州分韻得綠字

林光朝

銅盤白露下松桂淨如沐戀彼菊花團西風吹醞醪長安多別離  
此別苦不足人物如使君容物等潘陸一自海東頭清颺起謠俗  
館下欲何言聯翩如破竹功名不徒爾無乃相迫逐雙日訪延英



行矣公勿下括蒼煙雨前寒光貫巖腹大叫出銀鬢邂逅聚百族  
要攜三月糧所厭唯一羽幸心忽開張何曾畏笑僂單夫勿長吁  
老者猶可續道旁有抵璧天下輕結綠一夕洲渚言令我沈心曲

代陳季若上倉使

林光朝

大塊始開鑿媧皇爲補天天平雷雨正后稷誨之田大浸十二歲  
流金復七年幸哉堯湯氏以手摩撫然徂邱虐焰起秦俗相焚煎  
官租奪以半飽食何夤緣自從漢道昌敦樸乃其先初開常平議  
聚粟如源泉年登穀價賤散以大農錢早潦或艱食用之如轉圜  
悠悠百王心皎皎三代前井田日以壞此法當磨鐫公侯希世珍  
秀色媚長川官學有根株誦詩三百篇風土無隱情是爲大夫賢  
搏飯哺赤子當食長爾憐江東百萬戶彫俗生春妍持節閩嶺初  
有如病者痊劉晏取子術夷吾輕重權義倉有粟腐物價敢喧闐  
斯助阜民政南風吹五絃晝日公侯門客車動百千下吏走塵土  
從容愧執鞭豈不隨吹噓譬彼乘風船長技非卓魯主德奚由宣

松竹伴孤吟敢懷歲月遷終酬國士知未甘長棄捐

彭子復臨海縣齋

樓鑰

乾道癸巳冬此邦我經行鬱攸氣未殄十家真赤城來訪臨海令  
瓦礫紛縱橫翹然三尺高問是戒石銘徘徊重太息更聞愁歎聲  
試詢來者誰其言今姓彭我時語旁人此邑其將興迨予來作倅  
客館方暫停夜聞簫鼓沸聽事先落成起望輪奐美壯觀聳連甍  
百堵日已作斧斤喜丁丁層樓度勅書兩廡環中庭久乃遊其間  
宏大使我驚位置既深穩蹶削仍攻精田里不知役纖粟無輸征  
安得屋朗朗突兀有寧馨退食不苟處扁榜皆佳名中虛物自照  
政平由心平樨柏已可悅況有賢弟兄小亭真吏隱縣擁高山青  
琴堂雖增舊此意宜細評智調天下理夸言笑後生大絃可以急  
小絃恐勿勝舉意屬俄頃立欲如所營手足民無措吏姦益相乘  
不如疏節目示以信與誠施行有次第幽遠無隱情上下始相應  
溫和亮以清子賤意不傳僅許勝戴星彭令蓋得此所以千里稱



此非以政學淵源甚分明行笑解印去眾心已先傾太守薦之朝  
一鶚飛青冥旁無虬蟻援日夜思歸耕我無薦賢柄直書氣填膺  
安得採詩官取以徹明廷

題范寬秋山小景

樓 鑰

山高最難圖意足不在大尺楮渺千里長江浸橫翠人家雜煙樹  
懍恍徒意會苟或森三尺便若俗子對此畫格律嚴興寄獨超邁  
洗眼映臆明妙處乃不昧流泉見源委著屋分向背推車度危橋  
指路向關隘輕舟最渺茫浦嶼如有待山稜瘦露骨汀洲橫若帶  
木葉黃欲脫秋容儼然在霜餘無片雲厯厯數沙界搜尋目力疲  
欲賦無可奈近山才四寸萬象紛納芥欲識無窮意聳翠更天外

送劉德修少卿潼川漕

樓 鑰

清朝重諍臣選取妙一世矯矯劉御史一鶚勝百鷲顧瞻最有力  
步武亦嚴毅一生憂國心千古敢言氣氣足充所學文能行其意  
遇事輒奮發觸邪無顧忌乘驄行且止相戒遠且避但思補袞闕

何暇爲身計獨立當雷霆三進氣彌厲去魯固遲遲出畫豈濡滯  
上終行其言羣言爭挽致將輸向潼川寓直尙書秘風裁仰清峻  
進退審難易伊昔聯周行睽違十餘歲未爲同舍郎愈篤金蘭契  
洗眼看騰上寧知攬征袂抗章歎高絕勇退尤知愧去勿窮日力  
予環日月冀承君送道鄉硬語吁可畏毋以此自滿當爲不止是  
臨別提撕語少盡交朋誼萬里苟同心吳蜀安有異

送王木叔推官分韻得錦字

樓 鑰

王郎天下士中和自生稟澹然初無營見者輒儉衽幕中資婉畫  
處事極精審與人如恐傷律已淵冰凜深恐馬駛輿要使鴟食葺  
一寸憂國心幾年不甘寢此意大未酬退靜若已甚使之行所學  
庶幾人奠枕向來孰間之未免斯立噤川泳而雲飛賴有東陽沈  
露章極推轂分韻句裁錦風流有如許不復歎踔躑如君豈蓬蒿  
人物妙流品才應奉香火爲養謀祿廩與君幸瓜葛心交今十稔  
豈惟我惜別行道情苒荏紅蓮色何似翠柏風愈凜願君疏藥裹



一意護茵飪棄鼎寶康瓠浮名如拾藩行矣無多言臨岐且劇飲  
被旨許浦闕舟歸

袁說友

皇家百萬兵一一供行闕頌恩勞軍士有詔涓良月鳴鑾肅天仗  
君王自親閱旌旗照鞶鼓鎧甲耀冰雪金繒辱君賜再拜嵩呼疊  
天子曰嘻哉長江殆虛設雲屯皆壯士寧有中外別迺命臣袁某  
腆犒均行列許之間軍旅利害與優劣臣聞疇昔論舟師利通捷  
出入如風馳進退如電掣鄉來經始意規置有餘烈更張一何誤  
事亦隨廢缺橫舟卧平沙整胄半折裂蒙衝纔什五水卒無臬傑  
祇今眾弊見噤不一語決往往憂國者無路伸喙舌小臣愧不敏  
銜命紆華節願陳一得慮竹頭而木屑方略許圖上稽首思罄竭  
君王赦其愚臣敢畢其說

贈王副判

袁說友

將軍年少時束髮在行伍西方頃多事二十勇如虎一身殆百戰  
手足瘡四五征行久邊戍肯憚服役苦西陲五十郡一一經險阻

一官三十年銖積僅如許我聞中興後卷甲久未舉宿將零落盡  
屈指不可數政恐據鞍者驕懦如嬰乳時平偶無事酒肉而子女  
問之行陣事縮頭而栗股有如將軍子少小服軍旅金瘡歷歷在  
未老勇亦賈抵掌談世事忠憤氣如鼓願欲奏君王臣不知死所  
輕舟明月夜慷慨聞奏語醜酒誓長淮有力期共努歸去覲前旒  
此懷須盡吐

梁寺丞見示過嶺新作

羅願

凌晨登鬱孤南走韶陽道封疆有申畫山川本懷抱公行度塞嶺  
殘雪故未埽高情無南北反謂茲山小頃來我嘗遊亦覺山媚好  
前賢因遠謫我輩得幽討兩崖瞻欲眩數樹攀且繞想公哦新詩  
千騎轉林杪銜冠候顏色約束軍聲悄韶陽古名郡四十專城早  
重華已千載蒼石在雲表魚龍舞幽壑遺韻蓋可攷以茲供撫玩  
或可薦壽考公餘亦時飲未用絕芳醪行行布恩惠正直神所保  
生朝無以自慰作留貧薦一杯

王炎



南宋文範卷六  
私居飯半菽官舍食無肉何乃太清生囊無一錢蓄人言骨相寒  
有智不如福貧者輕於葉富者重如玉輕重信然否世情手翻覆  
相彼守錢虜無厭溪壑欲口不談古今枵然瓢壺腹渠固笑我癯  
我亦笑渠俗珊瑚數十株胡椒八百斛冥冥鬼矚室一跌赤其族  
未若貧而安高枕睡常熟我家雲溪陽敲側數椽屋屋後蒔菘韭  
屋前種梅竹室中四立壁但有書可讀世故驅我來營此升斗粟  
仕不上青雲何如返耕牧頗怪草玄翁乃謂貧可逐卒歲一布裘  
終朝一饘粥此外何所求吾生無不足

南宋文範卷六

南宋文範卷七目錄

五言古詩

和林懿仲喜雪韻

陳傅良

除夜用前韻

陳傅良

送謝希孟歸黃巖四首

陳傅良

送郭希呂

陳傅良

讀范文正公神道碑有感佚事

陳傅良

寄題陳同甫抱膝亭

陳傅良

聞葉正則閣藏經次其送客韻以問之

陳傅良

送句熙載赴浙西

陸九淵

大隱屏

蔡沈

贈錢郎中

陳造

餞寄定海交代

陳造

魏帝廟

陳造



錢弊

郭家洲

陶淵明醉石

馮公嶺

宿石門

送林退思四川分司茶馬幹官

求先人墨蹟呈表兄黃季文

松江舟中四首

栗齋鞏仲至以元結文集爲韻

讀杜詩斐然有作

和李果州道傳同遊茅山贈

紹熙庚戌中秋後三日拜于湖先生墓

宋詩紀事

九客一羽衣泛舟分韻得尊字就送朱幾仲

董道輔

趙師秀

陳造

陳造

項安世

葉適

葉適

戴復古

戴復古

戴復古

杜旃

劉宰

送常世卿歸嘉興

勉子姪

答曾伯玉

訪梅

述夢寄趙靈秀

春日書懷四首

至後再見大雪楊尙書汝明約登天開圖畫閣分韻得平字

魏了翁

真德秀

趙汝燧

杜範

杜範

吳泳

徐文卿

夜讀花翁詩有感漫成鄙句拜呈藉以求教

桂

遊洞巖



懷古三首

韓流

登豫章城感舊

嚴羽

送嚴次山

嚴羽

山居卽事

嚴羽

發臨川

劉克莊

謁南嶽

劉克莊

上巳與二客遊水月洞分韻得事字

劉克莊

龍隱洞

劉克莊

玉溪雪夜

嚴粲

春日田家

黃大受

侍屏翁遊屏山分韻得水字

戴昺

秋日過屏山菴

戴昺

次韻李通甫賦中秋

高斯得

送王深道赴荆門教授

高斯得

山莊書事

方岳

讀白詩效其體二首

方岳

田制

方岳

酬友人

翁卷

送綱齋李監丞赴湖南提舉

樂雷發

贈蒲陽卓大著順寧精舍三十韻

文天祥

謝劉純父惠布

謝枋得

初晴

劉辰翁

題淵明圖

牟巖

贈術士邵易菴

何夢桂

淵明攜酒圖

梁棟

觀水

謝翱

九日

謝翱

北征

汪元量



宋宮人分嫁北匠

宋詩紀事

汪元量

遊玉仙洞題碧雲石崖

王執禮

雜詠酬汪鎮卿四首

林景熙

酬謝皋父見寄

林景熙

新豐道中

林景熙

洞霄宮

林景熙

大滌洞天

熊禾

上致用院李同知論海舶

金履祥

九日約同人登三峯

金履祥

龍井

汪炎昶

書興

方夔

續感興三首

方鳳

遊仙華山

方鳳

懷龔山人聖子

方鳳

春日攜客遊武夷

谷音

詹本

丹泉

洞霄詩集

呂同老



南宋文範卷七

長洲顧少卿先生鑒定

秀水莊仲方編

五言古詩

和林懿仲喜雪韻

陳傅良

常陽厥咎何君相疚朝夕愧莫慰羣黎淒其望三白是心與天通  
昨夜平地尺蓑笠在東阡耨鋤在西陌忍待明年飽欣及吾事隙  
海宇正無塵草木亦煥赫遙知紫宸朝千官手加額温綸粲龍光  
賀牘交馬迹銜枚懸瓢城仗節居延澤獨擁藍關馬共飯滹沱麥  
更願吾君相對此念忠赤當令挾纊温恩意到疆場有士如有年  
要皆旦日積袁安自甘寢掃軌無過客

除夜用前韻

陳傅良

又添犬馬齒常恐牛羊夕牙無數株牢髻已大半白六朝貴人家  
珊瑚高數尺復有陵邑豪沃壤動連陌居然燕巢幙忽矣駒過隙  
伊傅亦中壽至今名赫赫蒼苔臥風雨曾乏斷碑額中原五十載



胡騎亂禹迹誰當懶折腰去學陶彭澤憂端壓不下中夜歌秀麥  
昭代豈無人腰黃眼前赤鴻儒籌禁省壯士守邊場罷歌且杯酒  
澆此懷抱積柴門剝剝響已有賀年客

送謝希孟歸黃巖四首

陳傅良

紛紛竹帛傳浩浩金石刻淪亡已無限存亦誰愛惜如何伏羲氏  
文字二三畫姬孔豈不聖用以演周易  
法令如牛毛斯鞅信手成簿書積邱山趙張眼愈明萬人立下風  
國勢尊且榮未省三代前誰獨有此名  
圭璧襲纁藉山龍飾衣裳不聞燧古初而興自虞唐毀車崇騎射  
隸作篆籀藏至今人便之秦亦忽以亡  
累觴以爲歡班荆以爲儀交際貴如此勿使至意虧頗常怪小雅  
鹿鳴至魚麗賓主禮百拜六經似支離

送郭希呂

陳傅良

我門開重重我徑阻且深梅花獨相依聊以慰我心美人從何來

崎嶇自幽尋亦於琢冰中而和南風琴茶甲尙可羹新筍足同斟  
不知歲已華歸興生霜砧欲別復少住棲鳥歸月林客去鳥翺飛  
落花滿牆陰

讀范文正公神道碑有感佚事

陳傅良

武侯不可致元德造其廬公在衰經中乃上時政書維時君臣定  
事與草昧殊出處千載同豈必名迹如行伍拔大將寒飢得名儒  
推轂天下士百年用其餘生平慕河汾未許王魏俱慙慙八司馬  
意獨何區區自古朋黨論消復莽無期誰令羣疑亡韓富及有爲  
惜哉公不見功名止西陲

寄題陳同甫抱膝亭

陳傅良

稻粱不難謀軒冕亦易得胡爲抱膝翁惻惻復惻惻秋風墮碧梧  
鳳鳥去無迹愁吟草際蛩兒女淚盈臆忽然一長嘯孤響起空寂  
令人識雅頌一唱三歎息廬在路旁耕鑿在民籍行人聽笑語  
稚子共眠食讀書果何罪鬚髮又半白此意太勞勞此身常抑抑



抱膝且不可出門更何適但勿問門外蓬蒿若干尺

聞葉正則閱藏經次其送客韻以問之

陳傅良

順水去吳會逆水來夔門萬古逆順舟以斗占旦昏曩余好百家  
信不及魯論初亦半喜愕久之乍亡存白髮一無成頗識委與源  
風停波自平卻視消長痕六經夫何如夫子手所翻恆言但桑稼  
怪志無鵬鷗規圓而矩方往往萬巧攢諸儒各有得長短賢若干  
玉帛相會盟兵車相併吞一語苟暗合羣生皆晏温經成今幾年  
嘗試以是觀此道未軻死此書未秦燔猶之斗經天於以生蓋渾  
西方亦人豪國自爲乾坤書來入中州坐使學者奔君豈捨從之  
或但遊其藩吾聞欲乘槎鑿空訪河根孰與瞻斗車把柁行江湍

送句熙載赴浙西

陸九淵

平分浙江流東境浮海角其民仰魚鹽久已困征權麥禾與桑麻  
耕鋤到磽确往歲比不登場圃幾濯濯荒政勞廟謀賑廩聞數數  
飢羸不待飽其感君澤渥仁哉覆育恩所惡吏齷齪教詔彌諄諄

大隱屏

蔡沈

昔余隱屏東扁舟夾雙龍浩歌碧雲裏萬壑生清風羣仙幔亭宴  
玉女雙髻蓬夕景落寒巖照耀金芙蓉  
昔余隱屏北飄然度巖側誰知神仙居自與塵世隔瑤草冬更青  
琪花雪爭白橫玉吹寒空萬里天一色

武夷山志

贈錢郎中

陳造

利方利祿媒抱道俗不省詩書工發豕孰起世儒病錢侯挺直節  
蠻徼復蘭省劍氣夜星明鷗翻秋霜耿上前論世務萬乘爲首肯  
平生中原慮壯歲左符請不作黃閣想擬試白羽秉孤忠當宁知



宏圖時宰領羣兒須圓曲謂可力勝命彼此計乘除得喪喪崇鼎  
平生信所得一鑑照萬境幕中辭脂韋客右進嚴冷主簿聲牙伯  
評俗怒生瘳令君強項翁爭事不藏穎但有周舍思可無衛武警  
我亦意行者泥古志未逞朝來聽名理翦燭延落景寸田殊易荒  
有賴別榛梗效奇乏良策汲深慙短綆惟期佩公言不墮頽俗穿

餞寄定海交代

陳造

縣尹古子男今不一錢值低催奉簡書偵伺常屏息白簡與按章  
歲月供彈劾當路雖所懼姦民巧狙擊吻閒售蜂蠆意外變白黑  
防虞莫救過彌縫或逃謫政使有卓魯未容置形迹云何世難事  
君不動聲色編民翁風移惡少且心革田廬有笑歌魑魅亦竄匿  
斯人紀仁愛幾磨南山石政聲懿如此僅免繩治厄諸公蜚鵲書  
犯嚴尚遺力安得定海民爲君灑薦墨蘭臺傳循吏採訪多失實  
安得定海人爲君秉直筆嗟我吏隱者志在山南北身名萬金重  
如博試此擲賴今遺愛地一一可矜式政恐效西子美顰得嘲劇

江皋一樽酒聊挽朝天客妙樂喧江浪清譚到理窟盟言底遽寒  
舟駛潮水急西望念風義感歎徒玉骨

魏帝廟

陳造

佛狸歲未卯志欲吞宇縣當年江飲馬腥血浸淮甸無人飯耕牛  
有井巢歸燕至今閱遺史爲汝空飲恨緬想瓜步留殺氣纏吳分  
云何此山椒遺像儼高殿無乃甘事讐吳俗味所見或復綿歷久  
後嗣忘敵怨冥冥彼有識福汝吾敢信君看趙與薛狗國冒禍釁  
魏侯繼前躅長呼死白刃胡不尸祝之香火均遠近豈但祈神休  
抑使頑懦奮誰令決從違引手適我願

錢弊

陳造

爲家重牆垣爲民須貨殖楊廬國百戶東南賴控扼淮民魚米餘  
百貨仰殊域用銅防外泄用鐵乃奇畫一利伏一弊救弊要得策  
持貨貿官券捨此莫衣食錢貨天下用鐵乃限南北坐令兩淮民  
塊處斷貿易計鐵取券直十纔取六七朝賢愛淮民此困盍矜恤



銅鐵均國寶通變豈無術近甸視遠地未可岐畛域況今苦倒垂倚待振焚溺緣江八郡爾雜用顧何失官券朝北來淮甸暮安宅即今私鑄斷胡尙膠今昔吾貧復淮人計勢不容默

郭家洲

陳造

攜兒上絕岸微徑步蒙密人稀鳥烏樂老屋幾百室荒涼郭家洲籬落映殘日問俗得周旋磨門頗倉卒興衰今昔殊郭姓尙十七鄰里闕鹽茗翁媪僅盟櫛共說頻歲歉平陸江浪沒場圃或潭洞椽棋行蟻蛭去秋微收爾樵採取黔突接耳多樂郊一去恐兩失吾邦有杜母撫我不待乞蠲租桑柘在休役孫子佚意使流殍無寧後倉廩實官今潯陽來吏師那容失書紳拜此賜知後佐郡紱古來禪肉食多是芻蕘出必若窮吏道孰先究民疾剝膚快目前吾固笑無術

陶淵明醉石

項安世

石君匪招陶陶子豈知石偶然一醉閒成此千年迹當時素心人

鄰里今誰宅悠然獨君在入我晦翁室翁去三十年伊余復來客山眈道之前崖路久以塞攀緣出藤蘿指點見顛蹠想當酣臥時不記苔蘚泐無論牛馬後況說有刀尺持盃薦寒泉嘆息書此壘

馮公嶺

葉適

馮公此山民昔開此山居屈盤五十里陟降皆林廬公今去不存耕鑿自有餘風篁生谷隧雨旆來巖虛人隨亂雲入咫尺聲相呼四時草木香異類果藪腴採薪得崖花結綴成襟裾此亦佳窟宅可對幽人娛何必種桃源始入仙者圖甌閩兩邦士洵洵日夜趨辛勤起芒屨邂逅乘輪車山人老白首名氏不見書我獨何爲者拊身念居諸

宿石門

葉適

好溪瀉百壑南北傾萬峯山凡堆阜俗映岸羞爲容石門忽秀出老幹蔭滄洪捨舟從口入便已離塵中眾芳拱窟宅環峒獻奇穠藤蘿異態度尺寸疑施功錦茵翠織成照耀無春冬水行千丈高



南唐文苑卷七  
五  
歎薄不可窮更有洗頭盆雲深霧常封昔年謝康樂築居待其終  
繼作者邱裴語言亦稱雄邈然百世後未忝騷人風栖栖三羽衣  
日晏齋厨空之子歇過槩暫洗氛埃胸自歎苦淹留寂寞不易供  
嗟我老無用佞山久成翁結廬會昌側勢落魚蝦叢種竹似束葦  
栽松如斷蓬小兒餽盆孟何時至周公會當同此往代輪助之春

送林退思四川分司茶馬幹官

葉適

棄繻詆關吏廣殿射高名方從媚子引豈料讒夫傾京師恩暮降  
蜀道險朝昇執手郭西門惻愴難爲情有山擎空雪有谷匝底冰  
鳥樂謾後謀猿孤定先鳴漢中王霸地從古鋒鏑爭崩摧韓信壇  
闕落張魯營感子奮衣去容猛意自輕笑我老何怯萬里今橫行  
翩翩射鴨弓一笑翻綵翎那知海陬姪斗粟忘歸耕餘生信萍梗  
歸夢失林垌漲水有回波故鄉豈無情一醉會有日因之濯塵纓

求先人墨蹟呈表兄黃季文

戴復古

我翁本詩仙遊戲滄海上別手掣鯨鯢失腳墮塵網身窮道則腴

年高氣彌壯平生無長物飲盡千斛釀傳家古錦囊自作金玉想  
篇章久零落人間渺餘響搜求二十年痛淚濕黃壤君家圖書府  
墨色照青嶂我翁有遺跡數紙古田樣髮髯鍾王體吟句更豪放  
把玩竹林閒風寒凜悽愴昂昂野鶴姿愧無中散狀兒孤襁褓中  
家隨風掃蕩於此見筆法可想翁無恙出居寂寞鄉風月共來往  
眾醜成獨妍羣瘖怪孤唱一生既蹉跎人琴遂俱喪託君名不朽  
斯文豈天相舊作忽新傳識者動慨賞嗟予忝厥嗣朝夕愧俯仰  
敢墜顯揚志幽光發草莽假此見諸公句銘松柏壙君其啟惠心  
慰彼九泉望

松江舟中四首

戴復古

夜聽楓橋鐘曉汲松江水客行信匆匆少住亦可喜且食鱸魚肥  
莫問鱸魚美  
垂虹五百步太湖三萬頃除卻岳陽樓天下無此景范蠡挾西施  
功名付煙艇



秋風吹客衣歸興浩難寫寒林噪晚鴉紅日墮平野篙師解人意  
機棹酒旗下

扁舟乃官差舟子吾語汝汝為我作勞吾亦不汝負好向上塘行  
莫過荷葉浦

栗齋鞏仲至以元結文集為韻

戴復古

尋常被酒時歸到急投枕為愛次山文今夜醉忘寢偉哉浯溪碑  
千載氣凜凜春陵賊退篇少陵猶斂衽文章自一家其意則古甚  
太羹遺五味純素薄文錦聲牙不同俗斯文異所稟君君望堯舜  
人人欲倉廩古道不可行時對窻樽飲

讀杜詩斐然有作

杜旃

王澤久淪浹正音皆雅言百川忽西流青黃雜犧尊騷經吹死灰  
明燭日月昏綺麗兆建安宿古還開元夫子握元氣太音發胚臍  
明婁失毫芒神義隘乾坤再變六義彰一日五典悖上該周南風  
下返湘水魂仲尼不容刪餘子何足吞五季兵戈繁嘲啮蟲鳥喧

頽波既瀾漫新奇尚西崑吻喙生議評神鬼懷憤寃王蘇發醯饗  
黃陳窮河源煌煌百年閒後學同推尊時時或嘗鼎往往猶戴盆  
傲摹惑銅槃箋釋訛金根顧予小子旃獨受罔極恩神融淚交墮  
思苦心屢捫相望五百載如接顏色温爐冶無停止況復忝諸孫  
斯文誠尚存庶以起九原

和李果州道傳同遊茅山贈

劉宰

我家荆溪東矮屋八九間石田人不耕自占水一灣十年去城市  
樂此清晝閑飽聞西州英奧學窺孔顏見賢豈無時冰開水潺湲  
揭來絜齊俟一語開冥頑錦機神所秘啟視不吾慳追隨妙高臺  
勇往不作艱蹇步驅勿前逸駕杳難攀惆悵默無言詩卷慙空還  
三茅在何許天末聳髻鬢勝處不可窮老我常窺斑幽人去不歸  
夜鶴守松關夫君金玉姿秀氣超人寰興來得同遊句就知難刪  
應同太史筆有副藏名山

紹熙庚戌中秋後三日拜于湖先生墓

董道輔



曉出白下門瘦馬踏秋色鍾山度蒼翠慰我遠遊客暮投清果寺  
花草獻幽寂長廊靜無人落日照東壁平生張于湖萬里去一息  
翩然九州外汗漫跨鯨脊乾坤能幾時安用較顏距文章失津梁  
所念斯道厄夜闌耿不寢搔首聽蕭瑟懷人感西風翁仲守孤柏  
景定建康志

九客一羽衣泛舟分韻得尊字就送朱幾仲 趙師秀

人生苦行役不定如車轅況各異鄉井忽此同酒尊此尊豈易同  
意乃有數存西湖雪未成兩山翠相奔山根日照樹花放林逋村  
野饌具靡藿一飽厭百殮有客何多髯吐氣鄰芳蓀慷慨念時事  
所惜智者昏矧療匪無術諱疾何由論北望徒太息歸歟尋故園  
哆然黃冠師笑請子勿喧東南守太乙此宿福所屯吾子且飲酒  
酒冷爲子温

送常世卿歸嘉興

程秘

悔作唐山來山深交友絕相逢忽相得乍見乃乍別嗟此冰玉人

寒梅疏帶雪胸次羅文奎筆底耀離纈朝家渴英雋結網仍高設  
行且收殊科勉哉嗣先烈一編忠義傳奸萌歎先折千載懦夫魂  
脆骨變奇節識此吳中奇復幸拜前哲何異魯國人一朝獲雙玦  
晴雲起芝田東風催啼鳩慈庭有近書明朝動歸轍新抽草可茵  
微露花堪折相思復相思後夜天邊月

勉子姪

程秘

外物不足恃翻覆百年閒唯有萬卷書可以解我顏男兒貴立志  
達人得大觀百川日夜流與海會波瀾邱陵安于卑寧復望太山  
方當少年時髮齒未凋殘聖賢戶庭闊人人可躋攀謹勿隨餘子  
碌碌走邱樊

答曾伯玉

黃幹

白露下百草迅商薄修林幽人起長懷感此節物深攬衣自徘徊  
撫劍還悲吟丈夫各有志莫作兒曹心涉遠當疾趨畏影須就陰  
願言理輕車去上南山岑



訪梅

徐璣

訪梅行近郊寒氣初漸慙欲開未開時三點兩點白清枝何蕭疏  
幽香况岑寂頗知天姿殊絕似人有德逢君天一方歡然舊相識

述夢寄趙靈秀

徐璣

江水何滔滔渡江相別離揖子家舍前對子衣披披問子何所為  
旅舍未得歸執手一悲歎驚覺妻與兒起坐不得省清風在簾帷  
平明出南門將以語所知過子舊家處寒花出疏籬蕭蕭黃葉多  
裊裊歸步遲子去不早還何以慰我思

春日書懷四首

姜夔

九真何蒼蒼乃在清漢尾衡茅依草木念遠獨伯姊春來眾芳滋  
春去眾芳萎兄弟各天涯啼鳩見料理漢江出巨魚風雷入驅使  
安得挾我輜西征二千里

春雲驛路暗遊子渺歸程永懷故山下風雨悲柏庭翁仲不解語  
幽鳥時時鳴人家插垂柳客裏又清明

垂楊大別寺春草郎官湖家巷有石友合并不待呼瘦藤倚花樹  
花片藉玉壺老鄭絕妙筆辛楊句敷腴平生子姚子貌古心甚儒  
時邀野僧語閑與琴工俱酒闌興未了左轉南城隅大江圍楚碧  
煙水入元虛流落不自恨惟嗟故人疏一月三見夢夢中相與娛  
日日潮風起悵望武昌魚

武昌十萬家落日紫煙低亭亭頭陀塔高處白鳥棲白鳥忽飛去  
春山空四圍南樓有佳人再召且再辭閉門課文史櫻物深天機  
斯人不可致白鳥會來歸

至後再見大雪楊尙書汝明約登天開圖畫閣分韻得平字

魏了翁

天公閔赤子踊為林杯羹寸白未云厭賜以一尺平微陽動黃宮  
萬寶隨孳萌蝗妖坐遠屏癘鬼亦就烹東鄰文昌伯志氣為我傾  
攜朋樂時豐舉酒澆空明忻忻各有適耿耿未忘情不知宇宙內  
肯爾同陰晴前時聞帝輦隨雪登山亭亭高一流盼淮楚接神京



新毗正露立舊戍方長征

送裘司直得請西歸

真德秀

輕舸龍山頭木蘭作雙櫓飄然裘司直乘向南昌去問君鴻鸞中  
脫生遽如許棲遲三十年始得官掌故小須上上考豈不登省戶  
自言野心性味目九衢霧修竹歲云晚萱草秋亦暮嗷嗷投林鳥  
猶得反其哺江西父母邦非復昔饒裕蠻煙一腥穢樂歲且狼顧  
遺黎空杼軸行旅窘刀布天門窮萬里可望不可顛君今佐元帥  
精采繫一路瘡痍俟滌濯畫諾歸飲助先聲路人喜高節懦夫慕  
過當再前席一正天子度白鷗沒浩蕩蒼鶻在指呼我亦南陔人  
扁舟從此具

訪隱者不遇

趙汝燧

兩腋乘西風送我上高岑竹根一泉通石徑萬木森中有隱者居  
敗屋莓苔侵山空人不見雲滿挂壁琴兩鶴出候我逢迎啄衣襟  
應酬久頗厭走避不可尋誰伴山下去明月升高林

鴈蕩

杜範

東南富山水傑氣鍾雁峯巨靈排最屢妙力開洪濛斷崖據險絕  
峭壁凌寒空分岑獻萬狀轉盼無一同或疊如錦纈或鑄如青銅  
或前如鳳舞或卻如飛鴻或伏如臥虎或矯如遊龍並如兄語弟  
差如兒對翁銳如筆露穎岐如翦開鋒三湫分大小二靈儼西東  
古語聊近似天巧難形容我久埋世埃幸此拔天風應接費耳目  
魄磊羅心胸有僧本儒家伴我追雲蹤攀躋不知勞指引殊未窮  
胡然便語別問之以涕從爲渠遊興盡生我歸意濃幽討何草草  
回塗復怱怱還此未了緣邂逅須有逢

夜讀花翁詩有感漫成鄙句拜呈藉以求教

杜範

士有當世志誰肯專詩名自古巧文字與道關廢興傾坐聽君語  
雄辯窮麤精目中無全牛肯繁技未經胡爲趁風月候蟲相與鳴  
靜夜誦佳什冷然如夢醒瘦語自映澤險句自穩平譬彼有源水  
隨流作幽清奇抱歎皓首敗屋挑寒燈天運豈其然人力非所能



我讀淵明詩悠悠千古情銜觴豈好飲采菊非餐英何時共皋益  
賡歌在虞廷

桂

吳泳

南之山叢叢桂樹生也直朱華自成林不雜眾芳植上有青鸞棲  
因之爲羽翼移根上林苑零露滋曉色豈不罹凝寒高標孤竦特  
丹心能自渥身性不加飾所以離騷詞嘉其秉炎德相觀穹壤間  
人統形氣識陽根爲剛明陰質爲闇塞靈均莫能招聊與花辨惑

遊洞巖

徐文卿

跨馬絕風煙夜與雲俱宿彈琴向牕閒微月挂森木曉行巖上路  
一溪緣淨綠路窮入其中溪流貫山腹巖開類天設石亂疑鬼伏  
水從何自來乃爾瑩心目巖前野僧居種桃滿空谷惜已過芳時  
不見花芬馥平生青霞志恥受紅塵辱老我茅三閒茲山疑可卜

懷古三首

韓流

近城人語雜深山人語少露重滴煙嵐野水見魚鳥稻梁豐稔外

耕鑿願溫飽所以桃源人不與外人道

往來是日月變動是寒暑伏臘雖不周爾且對妻子遙知風塵表  
萬象互吞吐所以鹿門人江左不得取

少壯旣奚爲老矣復難強紫芝未必仙採之亦可餉耆耄八九十  
道可無俯仰所以商山人辭漢寧復往

登豫章城感舊

嚴羽

憂來不自得登城望高天寒雲四面起朔氣下長川脫劍且卻坐  
君心知惘然奈何平生志鬱抑江湖閒凜凜秋氣來茫茫落日晚  
長憂生白髮沈想忘朝飯向來經濟士本自碌碌人蕭曹刀筆吏  
樊灌市井臣徒步取勳業漢道爲光新我今何爲者飄飄去鄉國  
狂歌豫章城醉臥楓江碧但取英雄笑終慙倜儻生名當以德載  
事恥因人成獨酌還獨酌哀歌還寂寞安得凌風翰爲君拂寥邈

送嚴次山

嚴羽

四年棲嶺表三歲客海東人生貴安適奔走成何功去年喜歸來



山花春蒙茸弟姪各捧觴一笑生華風南山多紫芝北山多白薇  
雲空汗漫臺月午生涼輝俯仰僅一載脂車復征西豈以丈夫志  
萬里猶庭闈豈以名山川待公親品題故園松桂林一一含真姿  
何時賦歸來母令久凝思

山居卽事

嚴羽

稍欣入林深已覺煩慮屏霜果垂秋山歸禽度風嶺紛紛葉易積  
漠漠雲欲盛礪戶寂無人松蘿宵然暝惟聞山鳥啼月出柴門靜  
終歲寡持醪延歡聊煮茗羣書北窗下帙亂誰能整

發臨川

劉克莊

始予牛角來家居縮銅墨縣齋多休暇縣圃足戲劇雖云嗜梨栗  
亦頗窺簡冊弟妹俱孩幼親髮方如漆後予捧檄至軒蓋候廣陌  
於時志氣銳門戶况烜赫郡花照席紅湖柳拂鞍碧耆老互訊問  
酒餼紛狼籍今予挑色過城郭宛如昔高年彫落盡滿眼少朋識  
管子仕瘴煙屈叟掩泉窆門訪舊師目闇面黎黑買醪與之酌

往往話歷歷既生異縣感復起故鄉憶吾翁墓草深高堂已斑白  
貧居滄髓空遠遊溫清隔二季官海濱女子各有適曾不知阿奴  
碌碌在母側回思盛壯時去矣難復得因成臨川吟吟罷淚橫臆

謁南嶽

劉克莊

中原昔分裂五嶽僅存一嗟予生東南有眼乃未覲清晨犯寒慄  
馬上親歷歷怪雲何處來對面失窗窾午投勝業寺僧訝余不懌  
茗餘因獻嘲君定非韓匹彼來既軒露君至若封鐫余謂僧無躁  
茲可以理詰止僧坐悅亭霾翳忽冰釋石廩先呈身岫嶺俄見脊  
須臾天柱開最後祝融出高峯七十二固已得彷彿鄴侯何嘗死  
懶殘元非寂恍疑在山中明當往尋覓咄哉三尺雪孤此一雙屐  
駕言欵靈瑣樓堞恍丹赤柏深不見人畫妙如新筆珠櫛千娉婷  
彈棋撫瑤瑟茫茫鬼神事荒幻難究悉吾師太史公江淮遍浪迹  
茲焉又浮湘汗漫恣遊陟雖然乏毫端亦頗增目力規模五字體  
蟠屈萬丈碧詩成報褚中何必題廟壁



上巳與二客遊水月洞分韻得事字

劉克莊

勝踐造物慳貧交世情棄昔戒十客來且無一人至惟余暨兩君  
鼎足坐水次歡言天氣佳誰謂風土異高吟雜騷選序酌逮髻穉  
滌厓去惡詩捫石認缺字古來幾袂飲傳者纔一二蘭亭感慨多  
未了生死事杜陵更酸辛窮眼眩珠翠旨哉茲日遊超然遺塵累  
消搖千載後尚有浴沂意巖扉滑如玉歲月可鐫識

龍隱洞

劉克莊

先賢評桂山推爾居第一豁然碧搖戶夾似雙玉壁中有無底淵  
黑浪常蕩滿諒當割判初倍費造化力雷噴斧山開龍怒裂石出  
至今絕頂上干丈留尾吞靈論兒女子壯夫股為慄我來欲題名  
腕弱墨不食摩抄秋李碑文字尚簡質今人未知貴後代加寶惜  
狀流工駭舟人遊覺蕭瑟崑室寬如家迴權聊愒息

玉溪雪夜

嚴粲

雪霽天夜白月上江空明飲散客就船萬籟沈三更誰家竹籬岸

摸索疏枝橫不著色與香令我毛骨清醉魂乘沆瀣看舞婆羅城

春日田家

黃大受

凜寒陵熙春誰為禦其侮酸風吹積雪濃雲灑飛雨農夫荷耒耜  
俶載耕斥鹵為其有身累寧免自辛苦妻兒送中飯凍凌疆欲吐  
晚歸極困倦倒睡帶泥土朝來天光開紅紫新媚嫵南國踏青人  
日暮猶歌舞

二月祭社時相呼過前林磨刀向豬羊穴地安釜鬻老幼相後先  
再拜整衣襟醜酒卜瓊琰庶知神靈歆得吉共稱好足慰今年心  
祭餘就廣坐不問富與貧所會雖里閭亦有連親姻持殽相遺獻  
聊以通慇懃共說天氣佳晴暖宜早春但願雨水勻秋熟還相親  
酒酣歸路喧桑柘影在身傾敔半人扶大笑亦大噉勿謂濁世中  
而無義皇民

侍屏翁遊屏山分韻得水字

戴昺

攜琴入空山修竹翠相倚一曲千古心泠泠寄流水拂雲臥白石



冥搜契元理有時采薪人歌聲隔林起

秋日過屏山庵

戴昂

淒切抱葉蟬閉關棲樹禽入山本避喧復愛聆此音微颺動夕爽  
薄雲散秋陰眾籟闐以靜片月生東林

次韻李通甫賦中秋

高斯得

秋容滿茗溪天籟生菌閣幽懷對蕭辰意味更冲泊招朋傾一盞  
相與慰牢落抵掌談世事亦可資一噓須臾白玉盤高掛青綃幙  
賞心與景會喜極悲還作渺然望西南慨想舊猿鶴豈無首邱情  
歸去事耕鑿奈何朝廷上聚鐵方鑄錯時余晦將入蜀棄置勿復道洗盞  
更深酌我老倦吟詩無惊紀行樂故人詩筒來晨簷有鳴鵲

送王深道赴荆門教授

高斯得

蒼龍挂秋漢涼風鼓吾袂夜中不能寐慷慨悲有餘美人背我去  
山川渺盤紆平生稽叔夜龍性不可拘以茲直諫益弱念咸刊除  
四海豈無交誰為真丈夫温蜀本兄弟不過姓氏殊臨分悄無言

執手空踟躕世事舉目知安能共淪胥君理江介繼我念茗濱廬  
後會難前期且復立斯須努力崇明德歲寒盟可渝

山莊書事

方岳

晨興抹兩屨為口見驅追課童督秋刈野獲夜彭魄田翁適過余  
縑縷黑而瘠且言土力貧年登苦艱阨一飯不自期未議了租責  
昨者耆耆長來名復挂欠籍截絹入官輸官怒邊幅窄拋擲下堂階  
退字印文赤賣牛重買絲篝燈不停息明當叩東鄰假牛下牟麥  
久貧少人情恐復不見惜既去重感傷行行猶欠息我歸不能眠  
草根鳴蟋蟀

讀白詩效其體二首

方岳

我貧良亦艱未老生白鬚策名奉常第年已三十餘半生苦無幾  
寧不欲疾驅山麋野而僻所至皆崎嶇一登督視府兩駕太守車  
意見有不合索去不待炊所以二十載同一優侏儒豈如雲水身  
自適瓜芋區夕吾酒一瓢朝吾飯一盂貧賤與富貴本自有差殊



寄語劉伯龍母煩鬼揶揄

人生有窮達不係才不才造物所賦予聖賢不能回君看孔孟氏  
遇世何如哉豈其有不如王驩與桓魋以茲自忖度所遭已踰涯  
前瞻固不及後顧又可哈同時第進士或未離蒿萊歸來亦云幸  
瀟散月下盃山池芰荷過野岸芙蓉開幅巾一筇竹適可眠秋厓

田制

方岳

井田變阡陌萬世以罪秦商君信苛刻不過民自民漢名反秦火  
當與三代鄰今年田欲方明年田欲均寧知古井田不為賦稅湮  
百畝官所予無甚富與貧所為經界者要使風俗淳豈為橫江網  
竭不遺一鱗乃知三代時官與民為春秦民自生生官不與笑蠶  
孰云漢田制顧不如秦仁秦姑置勿問漢已摘摭猜誰其起鄒叟  
重與畢戰陳

酬友人

翁卷

常憂別時數每苦歡事疏矧知同心人契闊三月餘昨日攜瘦藤

往訪林間廬差池不一見出門恨何如今晨登僮來贈言委璠璣  
吟玩勿忍釋緇采搖衿裾子有供世才胡為未展舒我無資身策  
合守貧賤居積痾困疲薶焉得愁悶除慙勤荷久要尙肯念到予  
南枝早梅白古澗寒流虛明當復相尋行遊帶琴書嚼花飲芳泉  
哦詩更躊躇

送綱齋李監丞赴湖南提舉

樂雷發

吏統久已紊使選匪易為竭虺何秦秦鴻雁何纍纍持節豈不多  
曠職苟所私緬懷紫陽翁昔使東浙湄陳臬糾官邪揚仁蘇民疲  
茲道有先後哲儒昭令規綱齋寄瀟收邦懋灼帝知勵廉肅寮寮  
反稅驩鄉耆所學蘊淵道寬嚴權理宜茲總全楚境歌此皇華詩  
位穹民言邈壤廣吏蠹滋問俗職所重簡僚乃政基視聽貴遠周  
細微在可遺攬轡戒前路豈為好爵縻揆予忝英盼懷德念別離  
別離果何念康濟乃所期懿茲遠大業肇此咨度時勗哉振英采  
慰我湘民思



贈蒲陽卓大著順寧精舍三十韻

文天祥

人生天地間一死非細事識破此條貫八九分地位趙岐圖壽藏  
杜牧擬墓志祭文潛自撰荷鋪伶常醉此等蛻浮生見解已不易  
齊物逍遙遊大抵蒙莊意聖門有大法學者必孔自知生未了了  
未到知死地原始則反終始本一致後來得西銘精蘊發洙泗  
吾體天地塞吾氣天地帥一節非踐形終身莫繼志舜功禹顧養  
參全顧錫類伯奇令無違申生恭不貳聖賢當其生無日不惴惴  
彼豈不大觀何苦勤興寐吾順苟不虧吾寧始無愧人而有所忝  
曠達未足智卓哉居士翁方心不姿媚蒙議以去國七年無怨對  
風雨三閒茅松楸接蒼翠斯邱亦樂國未老先位置宇宙如許大  
豈以為做屣當其歸去來致命聊自遂天之生賢才初意豈無爲  
民胞物同與何莫非已累君方仕於朝名高貴所萃乾坤父母身  
方來日川至西銘一篇書順事爲大義請君觀我生姑置末四字

謝劉純父惠布

謝枋得

嘉樹種木棉天何厚八閩厥土不宜桑蠶事殊艱辛木棉收千株  
八口不憂貧江東得此種亦可致富殷奈何來瘴癘或者畏蒼旻  
吾知饒信閒蠶月如岐邠兒童皆衣帛豈但奉老親婦女賤羅綺  
賣絲買金銀角齒不兼與天道斯平均所以木棉利不畀江東人  
避秦衣木葉矧肯修懸鵲天下有元德孔融願卜鄰綈袍理不及  
共裘心自仁贈我以兩端物意皆可珍潔白如雪積麗密過綿純  
羔縫不足貴狐腋難擬倫絺纈皆作貢此物不薦陳豈非神禹意  
隱匿遺小民詩多草木名箋疏徒諄諄國家無楚越欲識固無因  
翦裁爲大裘窮冬勝三春拜嘉重感激觸物尤酸辛吁嗟彼寒谷  
鄒律今不神三宮坐穹廬雨雪或十旬安得移此惠飛到君王身  
塞上寒墮指挾纈誰爲溫人各賜兩端費銀二萬斤大軍四十萬  
談笑卻胡塵感君道義交何異骨肉親可與知者道眾人笑且嗔  
玉案未能報瓊琚慎則眞春秋二百年幣交幾君臣季札有贈好  
千古尙如新



初晴

劉辰翁

初日入高樓歸雲雜江樹魚遊新雨晴鳥語晨光吐天容豈復靚  
煙色轉輕素牆草麗車前巷溝映泥露窗明祛宿潤楚泫滑微靚  
會朝有宿客過午無來屢沼砌上蟻衣虛庭竿犢袴人生足無事  
世故非所慮彼語吾不聞清風有時度

題淵明圖

牟 嘯

淵明九日無酒坐宅邊菊叢中意殊寂寞江州刺史王茂  
宏諸孫已荷朝寄猶知有賦歸去來者能于此時遣白衣  
擔酒遠餉邂逅一醉大是奇事集中九日詩僅兩首無酒  
則曰塵簞恥虛疊寒花徒自榮有酒則曰何以稱此情濁  
酒且自陶而王宏所餉已西九日十有餘年略不見于詩  
何邪此翁志節耿亮與秋俱高往往逃于酒而寓于菊二  
詩之作一感一喜微見于意固不暇于歲歲皆詩此中有  
真意欲辨已忘言正當求之言句之外可也此幅筆雖簡

意有餘輒和己酉九日韻述其事醉中看畫未免發千古  
一笑

平日抱耿介四海寡朋交淒其九日至頗感顏髮凋無酒醒對菊  
風味乃更高誰識此時情白雲行遠霄地主有佳餉得得良已勞  
而我適邂逅赴飲如沃焦永言大化內朽質非所陶惟有飲美酒  
一醉可干朝

贈術士邵易庵

何夢桂

易道皆萬變萬彙寄一易大道降九流至理散方術譬猶八面牕  
八方可從入譬猶九達衢九軌所由出道術雖二致殊途極歸一  
得醫為倉扁得法為軌革郭氏探錦囊甘心步璇厯勿謂所執微  
垂名等籍籍易庵挾四技每技探易蹟技分易不精君獨精以密  
我愧絕韋編所得在一畫一畫未為病錯出已什伯四事君盡兼  
懼君苦行役持此應世閒化身須百億

淵明攜酒圖

梁 棟



淵明無心雲纔出便歸岫東皋半頃秫所種不常有苦恨無酒錢  
閒卻持盃手今朝有一壺攜之訪親友惜無好事人能消幾壺酒  
區區謀一醉豈望名不朽閒吟籬下菊自傳門前柳試問劉寄奴  
還識此人否

觀水

謝翱

積陰生壑雨野水學江流對屋見燈火相望南渡頭浮槎到高樹  
白鼉起滄洲變怪若不測神功安能尤稍退見涯涘及來痕沫收  
崩濤出白石隱隱如博投水揚洗荒根素髮生古愁見此候若化  
故流還膠舟荒源不可詰欲盡山雲求

九日

謝翱

秋風颯以至今日重陽日眼明對南山尚想陶彭澤向來建威幕  
頗見有此客驅車不小留駕言公田秫一朝又棄去此竟誰能識  
寄奴趣殊禮風旨來自北只今王江州建國功第一故是可珉孫  
舉動良足惜飲愧望柴桑稍以自前滌殷勤白衣餉猶恐不我卽

中路候籃輿要致已甚迫葛巾赤兩腳頽然向林宅此翁本坦蕩  
焉能苦違物雖然可計取中實未易屈華軒又何羨自載返蓬華  
終身書甲子往往義形色如使磷與緇安得爲玉雪籬邊菊弄黃  
粲粲正堪摘我方持空觴千載高風激

北征

汪元量

北帥有嚴程挽我投燕京挾此萬卷書明發萬里行出門隔山嶽  
未知死與生三宮錦帆張粉陣吹鸞笙遺民拜路旁號哭皆失聲  
吳山何青青吳水何泠泠山水定有極天地終無情回首叫重華  
蒼梧雲正橫

宋宮人分嫁北匠

汪元量

皎皎千嬋娟盈盈翠紅圍輦來路迢遞梳鬢理征衣復采鴛鴦花  
綴之連理枝憂愁忽已失歡樂當自茲君王不重色安肯留金闈  
再令出宮掖相看淚交垂分配老斲輪強顏相追隨舊恩棄如土  
新寵豈所宜誰謂自當爾苦樂心自知含情理金徽煩聲亂朱絲



一彈丹鳳離再彈黃鵠飛已恨聽者少更傷知音稀吞聲不忍哭  
寄曲宣餘悲可憐薄命身萬里榮華衰江南天一涯流落將安歸  
向來承恩地月落夜烏啼

遊玉仙洞題碧雲石崖

王執禮

已從鹿巖遊更入龍洞去橫足螃蟹行連臂猿狖度徑滑鏗屐齒  
陰屋然樺炬振策扶顛躋門蘿猛攀附塗險幾欲窮境勝思有遇  
谿訝通石竇參差流石乳形開趣彌深興集理自裕便將遺世紛  
且復滋幽步紆徐窮冥搜淹留迫頽暮題詩識蒼壁聊寫心跡素  
重遊豈無期恐忘來時路

咸清臨安志

雜詠酬汪鎮卿四首

名鼎號桐陽平陽人

林景熙

百感湊孤夜江樓起呼月秋蟲聲轉悲念此眾芳歇人生非金石  
青鬢忽已雪踰淮橘心移出山泉性汨猗蘭抱孤芳不受宿莽沒  
淪惡易如墜進善難如登危哉方寸地風雨吹冥冥尺水增文波  
鯀鱉亦爲鯨海桑空變易天地終清寧感此坐中夕疏林動秋聲

垂垂大厦顛一木支無力精衛悲滄溟銅駝化荆棘英風傲几礎

濱死猶鍊脊血染沙場秋寒日亦爲碧唯留吟嘯編千載光奕奕

權臣坐偃月棄官如飄蓬及茲顛沛秋翻然挺孤忠一死未得所

網羅挂秋鴻渡淮已不食蛻稿夷齊風何人續遷史表爲節義雄

酬謝舉父見寄

南劍人名

林景熙

入山采芝薇豺虎據我邱入海尋蓬萊鯨鯢掀我舟山海兩有礙  
獨立凝遠愁美人渺天西瑤音寄青羽自言招客星寒川釣煙雨  
風雅一手提學子屢滿戶行行古臺上仰天哭所思餘哀散林木  
此意誰能知夜夢繞句越落日冬青枝

新豐道中

丹陽地名

林景熙

長飈卷炎埃澄空出秋素迢迢鍊甕城回首隔蒼霧酒帘颺荒市  
笳鼓發深戍倚篷問舟人云是新豐路籬落雞欲棲野水牛半渡  
不見抱琴人斜陽在高樹

洞霄宮

林景熙



洞天有別雲福地無凡土嘉名此兼擅靈氣適專聚峯巒互重掩  
雲霧自吞吐飄然乘冷風一瓣謁瓊宇住山老黃冠迎客琪樹午  
魚魚美少年華裾集齋鼓往者修鍊人飛昇接高武爾來何寂寥  
山川亦今古甲第疑王侯億萬富倉庾所以氣體移學道不精苦  
吾聞郭許儔卓庵老林莽終日對白雲餐松飲石乳

大滌洞天

林景熙

九鎖絕人寰一嶂聳天柱自從開闢來著此洞天古奇石千萬姿  
元不費神斧帝勅守六丁山夔孰敢侮白晝中冥冥遊者必持炬  
或絢若霞敷或蹙若波詭或豎若旌幢或懸若鐘鼓或虎而爪踞  
或鳳而翅舞異狀紛獻酬清音起擊拊不知金堂仙恍惚在何許  
褰衣下側逕層嵐結瓊乳逕極罅轉深幽潭蓄風雨劣客童豎入  
恐觸蛟龍怒凜乎不可留長嘯出巖戶

上致用院李同知論海舶

熊禾

易經致民用肇自羲農先耜耜既生聚市易還懋遷公私不交病

本末無倒懸古人致主術稱物靡有偏厥初禹作貢不但中邦田  
四海自錫貢不憚來遠邊碣石來冀右海岱青徐連東南並淮揚  
亦自江海沿夫豈寶遠物有道歸陶甄成周制國用半在周官編  
虞衡與商賈胡不末利捐艱難開國心什一猶欲蠲哀益固有道  
公功格皇天後儒不知學說理多虛玄生財昧大道民命日益賸  
管商一作俑蠹弊貽千年魚鹽尚抑末奈何誘開阡懷清一以築  
熒獨堪哀憐封君擅半賦公私重熬煎寒機凍女手汗粒積農肩  
織衣不上體春粟不下咽傷哉力田家欲說涕淚漣何如棄之去  
逐末利百千矧此買船人入海如登仙遠窮象齒徼深入驪珠淵  
大貝與南琛錯落萬斛船取之不傷用之我何愆奈何味輕重  
屑屑窮算鞭錙銖較鷺股漏網魚吞船安得體國臣爲天掘璣璇  
上資國脈壽下拯民瘼癩朝夕禹貢志菲食甘胠九載不入門  
千古孰與賢更想公旦心待旦猶乾乾世俗各與驕曾不絲毫牽  
所以泰和治常在虞周前此道久已亡利欲光培埏豈曰治不及



曾是心無傳明公中州傑自是天分全問學甚充厚願力還精堅  
博物功不勞無欲心湛然維此一樞軸實秉大化旋如天有北斗  
物物歸璣璿帝念南海民風化舊所宣皇皇風霜節炳炳奎壁躔  
纖微亦何浼闔散有大權利用六府修制用九府圜古人不可作  
得意皆蹄筌誰哉識治本理此大化絃三代事寂寞念此中心悵  
書生武夷客偶此來海嶼使者採風謠詩歌寓倦倦

九日約同人登三峯

金履祥

景定甲子九月九日舍弟麟至何公權舅弟繼來定登高  
之約束行再約南仲元質二賢族子同登三峯初至山下  
策杖以登木石藤蔓之間尋徑甚微出其上始夷坦可得  
循隴而登則巉巖壁立氣象雄偉因捫蘿而上摩挲舊題  
又上重巖石曰在焉再上懸崖之間忽東峯有山行者三  
人遙相呼應指示洞處舊聞山下人言天將雨則是洞必  
先有雲氣越危石又數重始至巔聞其上有古瓦不知其

初何以有此何公謹由中峯陰崖而下呼之久而後應諸  
兄有息于山腰者上下相望恍如登仙四顧浩然若有得  
也歸來因紀其事桐陽叔子金履祥吉甫

九月天氣清高颺掃虛碧山色日嶙峋山意亦寥闊有來二三友  
勸我振雙屐問道始委蛇步巘轉深密犖確微徑藤蔓絆行色  
岡阜出坡陁重險更齋律絕壁詫天造石筍疑人立上上復攀援  
巍巍亦恂慄摩藓追舊題捫蘿着新蹠尙僂度崎巖盤薄踞危石  
誰鑿丹曰深碧瓦孰搏埴云胡半空中有此千載迹中峯寒劍氣  
幽洞飛靈液霏霏人閒雨往往此中出陰崖採芝人東岡並遊客  
虛谷遠應聲重崦近成隔而我獨油然振衣表千尺川原一以眺  
蒼莽浩無息長風拂巾袂太清可噓吸乃知艱險餘始有高明極  
益知身轉高冥然氣超逸登天信有基昇仙豈無術何當躡飛煙  
高舉振長翮倒景凌三光達觀天地窄

龍井

金履祥



嚴陵北高峯之上臨崖有井其實因崖下有泉疊石而止  
之登以爲井耳今山僧謂其開山祖師善導和尚講經致

龍抉石爲井蓋附會以神其法也

高峯餘洞氣石竇通靈液發源已太孤臨崖千萬尺井登回飛湍  
修綆收澄碧一飲清風生膚寸寒雲出山僧語似奇老龍事無迹  
我來翠微巔得此寒泉食東望子陵臺連峯對崑崙下有十九泉  
與此相仲伯因我招隱詩憑高三歎息

書興

汪炎昶

時時溪上行或與幽人遇手把一編書其依崖邊樹鷺近始暫飛  
魚驚卻重聚佳景不待求足熟自知處稚子愛相隨似亦耽幽趣

續感興三首

方夔

猛虎等百獸天賦與長雄曼胡秋利戟隅自磨青銅從茲世路暗  
羣行各西東吼地一長嘯颯颯來悲風飢來待人肉不數豹與熊  
肥頰而黑喙不知是何蟲坐臥不自防穴爾皮毛中爾虎雖云猛

一旦皮骨空慎勿欺微細卽且制神龍

惡木生高岡枝疏上指天雨露非有私蟠踞幾何年蕘子寢其下  
山鳥棲其巔匠石過不睨生理得自全皮爲野火燒根爲螻蟻穿  
空中不足恃一朝踏而顛上有千歲藤相依久纏綿樹猶不足保  
爾藤何足憐

驚禽營顆粒飛飛集邱隅遊人困行役十年落江湖煌煌秦與洛  
轉運天下樞啟明曜東漢萬足爭奔趨豈無爪距力遠利如孫吳  
得失昧前料青雲閒泥塗天命有厚薄定分不可渝歸來北山下  
俯仰收桑榆

遊仙華山

方鳳

仙華矗萬仞我乃廬其東日夕與山對今茲踏岑巖起左信奔鹿  
當前任啼狻大嘯崖石裂一覽天宇空蒼松飽風雨絕壑挂老龍  
樵斧不得睨撫根憩吾躬逸哉軒轅氏問道由崆峒龍髯一以遠  
千載悲遺弓猶傳少女靈鍊玉于焉宮山林重帝胄香火明民衷



我來重懷古攬涕臨西風何當速刺飛流洗磊落胸

懷龔山人聖予

方鳳

西北有傑閣岩堯切雲天綺牕通四望綽約流蘇懸中有絕代人  
端居方盛年被服既殊眾容采亦鮮妍瑤牀置寶瑟玉軫朱絲絃  
有時揚妙指泠泠宮商傳曲終恣仰頰託契軒農先靡曼諧里耳  
大雅誰能憐我欲往從者淮海生寒煙

春日攜客遊武夷

詹本

山脚健枝梧百里插蒼峭鄰鄰石可把曙色坐遠釣風水眞笙竽  
歷落太古調衣冠帶莽蒼山鬼驚二妙雲月正忘年花鳥更索笑  
迴船翠凌亂吾道付長嘯

丹泉

呂同老

馨沸檻外泉遠出天柱陽清音應空谷潛波渙寒塘昔人養靈芝  
長年此山旁金骨換玉髓素蚪朝紫皇尙餘浴丹池神光透扶桑  
蓬萊幾揚塵茲泉日泱泱我願滌世氛朗詠三元章手持北斗杓

下酌流霞漿



南宋文範卷七

Blank lined area for text.

南宋文範卷七

三



